

ሐብሬ ምን ውዛረት ትጃረት ወስናዐት

ውዛረት ትጃረት ወስናዐት ኮሮን ቫይረስ እቡ እንዴት አመሰመሰው ዲብ ገሌ መዳይን ዐድነ ልትርኤ ለሀላ ወሰክ ዐውል ለትከሰሰ ሐብሬ የም 21 ማርች አፍገረት።

ለውዛረት፡ እትሊ ኢያም ዲብ ዐውል ምህም ሓጃት እስትህላክ ከም ከረ እክል፡ ቅርጡጥ፡ ሰከር፡ ዜድ፡ ሓጃት ነዳሬት ውበዕድ ለሀላ ወሰክ ዐውል፡ ኩብቲ ለአለቡ ወደሚር ለኢሰምሐ ክም ቲ እንዴት ሐበረት፡ እሊ ዲብ መናበረት ሽዕብ ተአሲር ለቡ ውዳይ ሐድ እግል ልግባእ እግሉ ቀረረት።

እተ ውዛረት መስኡል ፈሬዕ ትጃረት ቀበት ዐድ አሰይድ በረኸት ተሰፋይ፡ ለእብ ገሌ ትጃር ልትርኤ ለሀላ መዋዲት መስኡልየት ቃኑን ለለአረፍዕ ወዲብ ክምቲ እንዴት ሐበረ፡ ናይ እሊ ለትሸረሐ ሓጃት ዐውል፡ ምነ ዲብ የም 20 ማርች 2020 ለዐለየ እንዴት ወሰክ ዲቡ ለአዝቤ፡ ብዳዐት እት ለሐቤዕ ለትረከቤ፡ አውመ አለብዬ ለቤላ፡ እብ አሳሰ ማደት ኢራትዕ አግቡይ ሸቅል ትጃረት ዕልብ.125/2002፡ አሰክ መትገላም ወነሰእ ሩክሰት ትጃረት ለከምክም ምስዳራት ቃኑን ክቡድ እግል ልትነሰእ እቲ ክምቲ ሐበረ።



አሰይድ በረኸት እንዴት አትሉ፡ ዲብላ ትፈናተ ድዋራት ዐድነ ፍሩራም ለሀላው አንፋር ንዛም ወቃኑን፡ እብ አሳሰ እሊ መምርሕ እሊ ምን እሊ ዕለት እንዴት አንበተው ምስዳር እግል ልንሰኦ ሰበት ቲ፡ መትነፍዳይ ላቲ ሽዕብ፡ ለገብኦ ምን ቃኑን በረ ላቲ መዋዲት ዲብ ልረኤ እቲ ወክድ፡ አንፋር ንዛም ወቃኑን

እግል ለሐብር ወምስሎም እግል ልትዓወን አትፋቀደ።

ብዝሓት ድወል፡ ምስል ፈርሀት ገሸለት ቫይረስ ከሮን እንዴት አትጸበጠው ዐውል ዲብ ወሰከው ናይ ከዘኖት ወሐቤዕ አዋይን ለአርአው ትጃር፡ ምን ደብእ መአሰሰት አሰክ ከልእ ሩክሰት ለበጽሕ ምስዳራት ነሰኦ ክም ህለየ ልትአመር።

መንደራረ፡ አረይ ፊሰቱለ ልውሕደ

ዲብ መንደራረ እተ ለሀላ መርከዝ፡ መርዒት ዓፍየት ወአትሐደሮት ለገብእ እግለን፡ ምን ለትፈናተ ድዋራት ዐድነ ለመጽኦ ፊሰቱለ ለሳደፈየን እማት፡ ዕልበን ክም ትደህረ ተሐበረ።

ሚዲካል ዳይረክተር እስብዳልየት መርከዝየት እቅሊም ግብለት ዶክተር ሰምኦን ወልዱ፡ ቀደም እሊ አሰክ 200 በዴሕ ለዐለ ዕልብ ናይላ መራዐየት ለትገብእ እግለን እማት፡ እትሊ ወክድ እሊ ዲብ 25 ክሩይ ክም ህለ ሐቀለ ሸርሐ፡ እሊ፡ ፍገራት ናይላ ገብእ ለሀላ ጅህድ ሕበር፡ ልትህየብ ለሀላ ድራሳት ወካሬ ከደማት ክምቲ አብርሀ።

ዶክተር ሰምኦን እንዴት አትሉ፡

ዝያድ 90 ምእታይት ምነ ዲብ መርከዝ ለመጽኦ አረይ ፊሰቱለ፡ እብ ለትገብእ እግለን ዐመልየት እንዴት ሐየ፡ ዲብ አምዕላይ መንበረተን እንዴት አቅበለየ ዶል ትርኤ፡ ለተአፈሬሕ ነቲጀት ናይላ ጅህድ ክምቲ ሸርሐ።

ለአንሳት፡ እብ ለጀሬት እተን ምሽክለት ፊሰቱለ፡ ምን-መጅተማዕ መትከራም እግል ኢልሳድፈን ሽዕብ ለወድዩ እግለን አትናያት ወሰዳይት፡ ዲብ ናይ ሐየት ወአትሐደሮት በራምጅ እብ ቀላል ለኢትርኤ ፍገራት ክምቡ ለሸርሐ ዶክተር ሰምኦን፡ አንፋር ማ/ወ/አ/አ/ኤ እዳረት ምዴርየት ሰምበል እግል ወደያህ ሰዳይት ሐመደ።

በዐል መቅደረት ሕክምነ ዕምሰነ

ወወሊድ ዶክተር ዳዊት ሰረቆ እብ ጀህቲ፡ አሰባብ ፊሰቱለ - መሐጽ ክሩዕ፡ ህዳይ ተሐት ዕምር፡ ክሸቡ፡ ክምስልሁመ ኢረኪብ መራዐየት ቀደም ወግረ ውላደት ለከምክም ክምቲ ሐቀለ ሐበረ፡ ዲብ ዓፍየትላ ሐማይም ወዲብ ዕያለን ለከልቀ ሸንርብ ቀሊል ሰበት ኢኮን፡ አንሳት እግል ልትደገገ ትፋኑ።

ወካይል አንፋር ማ/ወ/አ/አ/ኤ እዳረት ምዴርየት ሰምበል እብ ጀህተን፡ ሕክመት፡ እግል ፊሰቱለ ለሳደፈየን እማት እግል ትራዴ እብ ኩሉ ጀዋንብ ትወድዩ ለህሌት ጅህድ ሐቀለ ሐመደ፡ እብ ቅድረተን ለወድያህ ሰዳይት ራሐት ደሚር ክም ተህይብን ሐበረየ።



ውዛረት ሐርሰ፡ ራቴዕ መትነፍዳት ድድ-ባልዒን ተአትናይት

ውዛረት ሐርሰ፡ ዲብ ጠማጥም ልትርኤ ለሀላ ክሰሐ እብ አድውየት ድድ-ባልዒን ሐቀለ ሸርሐት፡ ዲብ መትነፍዳት ድድ-ባልዒን እት ፈርያት ሐምሌ ወፈዋክህ መትደጋግ እግል ልግበእ ትላኬት።

አድውየት/አሰማም ድድ-ባልዒን፡ ድድ-ተብዕን፡ ድድ ሀረሞ ወድድ ሐሸራት እንዴት ትበህለ ክም ልትካፈል እንዴት ሸርሐት ለውዛረት፡ ሰም ሰበት ቲ፡ ዲብ አግቡይ መትነፍዳቲ ወጽብጠቲ መትደጋግ ውቁል ክም ጠልብ አብርሀት። እብ አምር ወመትደጋግ ሐቆ ትነፋዕነ እብ ዲብ መዳፈዐት ወአብደየት ባልዒን-ብቅል ለለአገድዩ ዶር ውቁል ክምቲ፡ እሊ ሐቆ ኢገብኦ ላኪን፡ ዲብ ዓፍየት ወድዋር ለለአመጽኦ እከ ክቡድ ክምቲ ወድሐት።

“እብ ፍንቲት እት ጅወ-ዘርእ፡ ፍሬ አው ክፋላት ብቅል ለለአቲ ድድ-ባልዒን ወክድ ንትነፈዕ፡ ለሸቅል ትሩድ መትደጋግ ለጠልቡቲ።” ለትቤ ውዛረት ሐርሰ፡ ደወ ድድ-ባልዒን ሐቀለ ትረሸብ፡ እት ረከሰ ፈርያት ለለሐድጉ ተራሪፍ ደወ እት ዓፍየት አዳም ብቅት ሰበት ሰብብ፡ መትነፈዳት ድድ-ባልዒን ላቲ አድውየት ምን ልውሕድ ክልኤ ሳምን ቀደም ኣሪ ሐምሌ ወፈዋክህ እግል ልግበእ ተሐሰበት።

ውዛረት ሐርሰ እንዴት አትሉት፡ “መትዳጋን ባልዒን እብ ናይ ሕበር እዳረት” ለልትአመር በሰር፡ ዲብ መራቀበት ባልዒን ዶር ውቁል ክምቡ ሐቀለ ሐበረት፡ ዴቅረት ባልዒን ወሕማማት ላቲ ብቅል ምን ድዋራት ሐርሰ አንደፎት፡ እግል ባልዒን-ፈርያት ሐርሰ ለለአበዱ ብዕዳም ጅንሰ ባልዒን አተየት፡ ክምስልሁመ ባልዒን ለልሰሕብ አንዋር ወለልትጸበጦ እቲ ማይ እንዴት ትዳሉ፡ ገሌ ምነ እብ ቀላል ገበይ እግል ልግበእ ለቀድር ወምነ ለትመጽኦ መደረት ለለአድሕን ክምቲ አብርሀት።

እት ደንገበ ህይ፡ ጠማጥም-ክሰሕ ዲብ ዐዳገ እግል ኢልትከሬ ምስላ ለትከሰሶም ጀህት እብ ገብእ መትዓዋን፡ ለትትሐዜ መራቀበት ትገብእ ክም ህሌት እንዴት አክደት፡ ሐረሰቶት እግል እብ ሰብ መቅደረት ሐርሰ ለትትህየብ ራትዐት ገበይ መትነፍዳት ደወ ድድ-ባልዒን ለትከሰሰ ሐብሬ እብ ቱሉሉይ ዲብ ፍዕል እግል ለአውዕሎ፡ መትነፍዐት ህይ፡ እንዴት ትደገገው እግል ልትዛበው አትፋቀደት።

አፍዐበት፡ 32^{ይት} ሰነት መትደውሻሽ ናደው እዝ ትዘከር

ዲብ የም 18 ማርሰ፡ ዝክረት 32ይት ሰነት መትደውሻሽ ናደው እዝ፡ እት መዲነት አፍዐበት እብ ነያረት ተዐየደት።

እተ ብዝሓም ሰነን አፍዐበት ወድዋረ፡ እተ ባካት ለሀላው አንፋር ቅዋት ድፈዕ፡ ወምን ድዋራት ብዕድ ለመጽኦው ቤጽሐት ወመናድሊን ገዳይም ጅብህት ሽዕብየት ተሕሪር ኤረትርየ ለሐድረወ ዓደት፡ ሙዲር ምዴርየት አፍዐበት አሰይድ አሕመድ መሐመድ-ኖር ረጀብ እተ አሰምዐየ ከሊመት፡ መትደውሻሽ ናደው እዝ ወተሕሪር መዲነት አፍዐበት፡ ፍገራት ናይላ እምበል ዕርፍ ገቢእ ለዐለ ሕሩሳት ወመዳፍዐት ሽዕብ ወመናድሊን ክምቲ እንዴት ሐበረ፡ ዕምር እስትዕማር ኢትዮጵያ ዲብ ኤረትርየ ለለአከትም እተ ወሕርየት ለትትበሸር እተ ኢነት ረያም ክም ኢኮን ለአከደ ክም ዐለ ሸርሐ።

ለመናሰበት፡ ለተእሪካይት ወዐባይ ዐውቲ ክምስልሁመ ሰሙድ ሽዕብ ወመናድሊን እብ ለአርኤ በራምጅ ፈን ወዓዳት ወዝክርያት

ሰብ ወቀይ እብ ጋምለት ክም ዐለት ወኪል ኤሪነ ሐበረ።

እተ ዒድ ለሻረክ ሓክም አቅሊም ቅብለት በሐር ቀየሕ ለዐለ ብርጋደር ጀነራል ተክሌ ልብሱ ወሐዳሰ ሓክመትላ አቅሊም አሰይደ አሰመረት አብርሀ፡ ምን ሽዕብ አፍዐበት ህያባት ትህየበው።

ምን የም 17 አሰክ 19 ሰነት 1988 ለገብኦ ዐጃይብ መትደውሻሽ ናደው እዝ፡ ዲብ ጅብህት ነቅፈ ሻፍፍ ለዐለ ዝያድ 20 አልፍ ተጃርብ ለቡ ዴሽ እስትዕማር ደርግ፡ ምስል ናይ ሶሻየት ጊምየቲ ወጌዳን ለአለቡ አሰልሐት ዲብ ቀበት 48 ሳዐት ጨበል ረምየ ለገኦ እተ ዐመልየት ተእሪካይት ቲ።

ወድ እንግሊዝ ላቲ ባሕሰ ተእሪክ ባዚል ዴሺድሰን፡ እግል ዐመልየት መትደውሻሽ ናደው እዝ፡ ምስል ናይ ሼትናምዩን ዲብ ዴሽ ፈረንሰ ለተዐወተው እቲ ናይ ሰነት 1954 ሐርብ “ዴን-ቤን-ፋ” እንዴት አትመጣወረ ክም ሸርሐዩ ልትፈቀድ።

ዝክረት 43ይት ሰነት ተሕሪር ነቅፈ



ለዲብ 22 ማርች 1977 ሐቆ ናይ ስሰ ወሬሕ ከርዶን ወሐርብ መሪር ሐቱ ዶል እግል ዲመ ለትሐረረት እሻረት ስሙድ፡ መትሰበል ወፍርስነት ላተ መዲነት ነቅፈ 43 ሰነት ተሕሪር እብ ነያረት ዐየደት።

እተ ወዘረት ሰያሐት አሰይደ አሰካሉ መንቀርዮሱ፡ ሓክመት አቅሊም ቅብለት በሐር ቀየሕ አሰይደ አስመረት ኡብርሀ፡ ብርጋደር ጀነራል ኡብርሀ ካሱ፡ ብርጋደር ጀነራል ተክሌ ልብሱ፡ ርኢሰ መጽልሰ አቅሊም ቅብለት በሐር ቀየሕ፡ ቅያደት ዲሽ፡ ሚርሐት ደያናት ወእብ ኣላፍ ለልትዐለብ ሽዑብ ነቅፈ፡ ከምሰልሁመ መድረስት ዕሉም እጅትማዕየት ነቅፈ ወመሕበር ጀማሂር ሳሕል ለሐድረው እተ መናሰበት እብ ነያረት ተዐየደት።

ናይ ዮም ዓመት ዒድ ተሕሪር ነቅፈ ምን ሐልፈ ዓያድ ፍንቲ ለቤላቲ። እሊ ህዬ፡ ነቅፈ እት ታሪክ እብ

እተ መናሰበት ሰበት ገብአት፡ እብ ፍንቲት ለትዘከር ሰነት ዋዲህ ሀለ። እሊ ምን ወግሬት እስክ



ጅህድ ወጸገም ሽዑብ፡ ሽቃለ ሕኩመት ወኣንፋር ቅዋት ደፋዕ ለትሸቀ ወእት መዲነት ለአተ ሽዐበ ማይ ጽሩይ ለሰተ

ነቅፈ ዝያድ 08 ኪሎ ምትር ለልትመደድ ዐነድር እብ ሒለት ጸሓይ ለሸቄ ማይ፡ ዝያድ ሴዕ ሚልዮን ነቅፈ ለክለፈ መሸሩዕ፡ እግል ሰነን ነቅፈ ብሸራት ዐባይ ክምሰልቱ ሙዲር ምዴርየት ነቅፈ አሰይድ የዕቅብ እድሪስ ሐበረ።

ዮም 21 ማርች ለመናሰበት ሳዐት 8:00 እት መዲነት ነቅፈ ለአንበተ ቡቲክ ሪዮን ወግራሁ እብ ክታር መካይን እስክ ወግሬት ለገብአ በጼሕ ሰብ ሰልጠት ወሽዑብ አንበተ። እብ ፍንቲይ ለእት ወግሬት ምሰለ እት ሸቅየት ከዛን ፍሩራም ለህለው ዲሽ ወሰካን ወግሬት ለገብአት ኩብቲ ወሕድርኖት ገማል ለወሰክት ክፋል ናይለ መናሰበት ዐለት።

ለመናሰበት እት ስታድዩም ነቅፈ ሰዓት 4:00 አልዐስር ተአነብት እት ህሌት፡ ሽዑብ መዲነት ነቅፈ፡ እት ነቅፈ ለህለ መዳርስ ወዲሽ እብ አሴራር ሰላም ዲበ ስታድዩም ክምሰል አተው፡ ለበርናምጅ እብ ዝክረት ሹሃደ አሰብደ።

ለበርናምጅ እት ወክድ ንዓል ልትሐሌ ለዐለ ወእት ዝክርያት ለበልሰ ሐልየት ሰውሪ ሐነን እት ልብል፡ እግል መናሰበት ዝያድ ነወረየ።

ሐቆ እሊ ክሊመት መመቅረሓይት ለጅነት

ወክሊመት ሙዲር ምዴርየት ነቅፈ ደርብ ሕድ ክም ትቀደመየ ለትፈናተ አሸዓር፡ ተማሲል ወሐልየት ትቀደመ።

ዲበ ሙዲር ምዴርየት ነቅፈ አሰይድ የዕቅብ እድሪስ ለቀደመየ፡ ማይ ጽሩይ አሳሰ ዓፍየት ምን ገብአ፡ ሽዑብ ነቅፈ እብ ክሉ ሒለቱ እት ሰርገሎት እሊ መሸሩዕ ለአርአዩ ጸገም ወመዕጸም ለልትሐመድ ክምሰል ዐለ ሐቀለ ሸርሐ፡ ለእት ክል ሰነት እት መናሰበት ዒድ ሕርየት ነቅፈ ምን አስመረ ውበዕድ

አካናት ረዩም ሐውልየቶም እት ነቅፈ ለልሓልፎ መሕበር ጀማሂር ሳሕልመ ክምሰል እሻረት ፈርሐቶም 10,000 ነቅፈ እግል እትሊ ወቀይ ዐቢ ለሻረከው መትብረዖቶም ተኣምርተ መትሐሳሮም ክምሰልቱ ሸርሐ።

ዲብ ደንገበ እግል እትሊ ሸቅል ለሻረከው ጀሃት፡ መአሰሳት ወአፍራድ እብ ወዘረት ሰያሐት አሰይደ አሰካሉ መንቀርዮሱ ውብርጋደር ጀነራል ተክሌ ልብሱ ናይ ተቅዲር ሽሃዓት ተህየበ።

ዲብ ደንገበ ሰነን መዲነት ነቅፈ ክም እሻረት ፈርሐቶም፡ እግል ትሳረሐ ሕክም አቅሊም ቅብለት በሐር ቀየሕ ለዐለ ብርጋደር ጀነራል ተክሌ ልብሱ ወሐዳሰ ሓክመት አቅሊም ቅብለት በሐር ቀየሕ ለገብአት አሰይደ አስመረት ኡብርሀ ሀድያት ሀበው።

እብ ክምእነ መናሰበት 43ይት ሰነት ሕርየት ነቅፈ፡ ለመዲነት እት ተእሪክ እግል ሰልፍ መረት ማይ ዋዑም ለሰቲት እቲ ለገምለ ዒደ ዐየደት።

ምን ገጽ 3 ለተላለ

ሐቆ እሊ ፍረወይኒ ወጀዕ እንዴ አለበ ክምሰል ትትወጀዕ ለህሌት እት መሰል ዲብ ረአሰለ መኪነት እንዴ ትመደደት ተዐልጅ ወተሃፍት ዐለት። እሊ ብስር እሊ ክሉ ለመምተላካት ሰውረት እግል አንጀየት ቲ ለዐለ። ፍረወይኒ አክል ሕድ ክምሰል ጅርሕት እብ ወጀዕ እግል ተሃፍት አስተብዴት። አሕ! ዲብ ትብል ህዬ ትላመደት። ለአንፋር ጀማሂር ለመሀዘ ወተምሲልየት ተዐውተናተ እንዴ ቤለው ክምሰል አክደው ህዬ፡ ለመኪነት አዜመ ተጅርበት ሰዋገት ለአለቡ ሰዋገ እት መረሐ ትብላት። ዐብደልከሪም ጽብጠት ጀረክሶን (ሱቴርሶ) ለትሰረረተ ብዕድ አምር መኪነት ለአለቡ መስኡል መጅመዐት ሀንደሰት ለዐላቲ። መኪነት ራንሬን ዲብ ትብል አስክ ሕዱድ ሱዳን ገጸ ተሀርበበት። ፍረወይኒ ዲብ ረአሰለ መኪነት እንዴ ገብአት ትትወጀዕ። ለከላሽናት ህዬ ዲብ ሐንቲህ ንጻፍ እንዴ ገብአ እሊ እብ ሰላም እት ድጌ ሰውረት እግል ልብጸሕቲ ለጸገም። ዐብደልከሪም ሰዋገ ፈዳብ እግል ልምሰል መኪነት ሓን ሓን እት ለአብል ድማን ወድገለብ እት ሸጋልል አስክ ቅርረ ሱዳን እንዴ ጸብጠየ ጠበሽ ቤል እበ። ምንቀደሙ ለትመደደ ከሌብ ሐብል ላኪን እበየ እግል ልሕለፋ። ዲብ በዋረ።

ዐሳክር ሱዳን ለመኪነት ክምሰል ረአው እግል ልፈተሾ ትባደረው እተ። ክምሰል ዕሽል ንህብ እብ ክሉ እንክራተ ህዬ ትከለለው። ግንሕ ክምሰል አበለው ላኪን እት ረአሰ ለኢትጸበረወ ወለት አንሳይት ክሉ ገርብ እብ ደም እንዴ ተሐንገረ ዲብ ተዐልጅ ወተሃፍት እት ህሌት መኪነት እንዴ አብጠረው እግል ልፈተሾ አርወሐቶም ኢወዴት እሎም። ለዐሳክር እሊ ክምሰል ረአው ምን ክትር ረሕመት ወለ ጅርሕት ለዐለት አንሳይት ምን ገብአት፡ ሰኒ ትሻቀለው። ዐብደልከሪም መስኡል መጅመዐት ወሰዋግለ መኪነት መቶር መኪነቱ ሓንሓን እት ለአብል ረአሰ እብ ሸባክ እንዴ አሸበበ “ምን ፈድለኩም እሊ ጅርሕት እብ ሸፋግ ዕያደት ዐየት እግል ነብጸሐ ሰደው” ቤለዮም ዲብ ልትመሳክን።

ለሱብ ኬር ዐሳክር ሱዳን እግል ማጽኣም እሉ ለዐለው ዳይ እንዴ አዝመው ምኑ፡ እብ ጅረሕ ናይለ ምናድለት ሰኒ ትሻቀለው። “መዐሌሽ ትፈደሎ” እንዴ ቤለው እግል ሰዱድ ለዐለ ሓብል እንዴ ፈትሐው ሓለፈዎም። ለምስተክራይት መኪነት እብ ሰልሐ ወአዳመ እብ ሸፋግ እት ከርስ ምድር ሱዳን ትገናቤት። እብ ፈድለ ተምሲልየት ህዬ ለዲብ ፈርሀት ወቡፍ ዋድቅ ለዐለ ሰለሕ ጅብህት ሽዑብየት እብ ብስር ናይለ አንፋር ጀማሂር እብ ሰላም ዐየት አተ። ዐየትመ ምድር ሱዳን ሰበት ገብአ፡ ምኑመ ምን ሐዲስ ዲብ መኪነት እንዴ ትጸዕን እብ ገበይ ሐወልዕ አስክ ሚዳን አተ። አይወ ለእብ ዐውል ደም ለትረከበ ሰለሕ አዜመ እብ ዐውል ደም ምን ብቅት ነጅ። ለምን አጅል መንገፎ ናይ እሊ ሰለሕ ዲብ መደት ሐጫር ለትመሀዘት ተምሲልየት ህዬ እብ ዐውቲ ትሰርገለት።

መዳግማይ

ምናድል ዐብደልከሪም እድሪስ

እፈትርዮ፡፡፡

ክል አርቡዕ ለትጠ'በዕ ጀሪደት

መዳልየት፡-

- መሐመድ እድሪስ
- ክልሹም መሐመድ
- ኣድም ሳልሕ
- ሳልሕ እድሪስ

ለይአውት ወአርተዖት

* ዘህረ ዐሊ

* ፋዋን ኣድም

ተለፎን። 121797/07121322

ፋክሱ። 127749። ዕ.ሰ.ቡ። 247

ተውዝዕ ጀሪደት።

ተለፎን። 200454

ኢትኣመሮት።

ተለፎን። 125013። ዕ.ሰ.ቡ። 1284

2^ይ-ወናይ ደንጎበ ክፈል

ለተምሲልየት



ደብር ደምቦብየት

ለቅሮረ ክርዱን ለዐለ ጄሽ አባይ አስከ ልሽሕግ ምንመ ዐለ እት ወቅት ሐጨር እግል ልጽበጦ ላተ ኢቀድረ። ላኪን አምዕል ሐቲ እንዴ አትህመለ ለመዐስከር እግል ልጽበጦ ጀረበ ምንገብእ እሉ ለከሬዕ ጄሽ ሰውረት እተ ባካት ሰበት ይዐሉ። ለእብ ደም ወለህበት ምሔርበት ለተረበ ሰለሕ እት እዴ አባይ እግል ልብረድ ቀድር። ለምናድሊን ህይ እሊታት እት ለአምሮ እግል ሰለሕ እብ ሰዔ-ሰዔ እግል ልቅቦሩ አው እግል ለአንዱዱ ይሐረው። ዲብ ክእነ ህይ ዝያደት መስኡልየት ራፌዕ ለዐለ መስኡል መጅመቦት ላቲ ዑብደልከሪም እድሪስ ምስለ እት መዐደይ ሕዱድ ቅሮረ ሱዳን ለዐለ ውቁል መንዱብ ጀብህት ሽዕብየት መሐመድዐሊ ጣህር እግል ልትጋሚ አስኩ ጌሴ። ሽሂድ መሐመድዐሊ ጋህር ህይ “ሊሊት ከረ ወድ ፊተውራሪ ሐቲ ፒክ-ኣፕ ለጅንሰ ትዮተ እንዴ አምጸአው እትለ ሓድጋመ ህለው። መፍተሓመ እሊቱ ምስልይ ህሉ። ላኪን ሰዋግ አለብን” ቤለዩ። እሊመ ብዕድ መታክል ቱ። መኪነት ትወጀደት ላኪን እምበል ሰዋግ ከፎ ትግበእ? ምን ቅሮረ ሱዳን አስክ ቅሮረ ኤረትርየ ምን ለኣትዩ? እሊመ አርወሐቱ ለቀድረ ብዕድ መሳእል ገብአ።

ዑብደልከሪም ህለዮት ናይ እለ መኪነት ክምስል ሰምዐ ሌጤ። እብ ሰዋግ ኢትሻቀሉ። እግል ሰኒ ፈርሐ ወትብሰጠ። እምበል ጽብጠት ጀረክሶን ብዕድ አምር መኪነት ለአለቡ ዑብደልከሪም ህይ ግረ እንዴ ኢልትዋለብ እግል ዲብ መዐስከር ቅሮረ ለዐለ መምተለካት ሰውረት እግል ለድሕን ሌጦ ዐለ ሕሳቡ ወሸቀላቱ። እብሊቱ ህይ ናሱ ዲብ ሰዋግ እንዴ ትብደለ መፍትሕ ምን መሐመድዐሊ ጣህር እንዴ ነስኦ ባብ መኪነት ከስተ ወዲብ ክርሲህ ትገሰ። ሰኒ እንዴ አንገሳገሰ ህይ አሰልፍ ምግሳዩ ክምስል አዋፈሐ እግል መኪነት መፍትሕ እንዴ ሰቀ እተ ሓንጉን አበለዩ። እለ ክርን እለ እግሉ ብሸራት ዐባይ ተ ለዐለት።

ዑብደልከሪም እበ ሐፋነቱ ሸውዮ ጀርቤ መኪነት ሰበት ዐለት እግሉ ለመኪነት እለ ወደ እንዴ ወደ። ምን መዐደይ ሕዱድ አስክ ኤረትርየ እግል ለዐድዩ ወሐቆሁ እግል ብቆት እት ረኣሱ ተህንጦጥል ለዐለት መምተለካት ሰውረት አግደ

ሰለሕ እግል ልጽዐኖ እተ ቀረረ። ለብዙሕ አምር ሰዋግት ለአለቡ ሰዋግ እግል ሐጸ ለበዝሐ እቲ ኤረትርየ ወሱዳን ለፈንቴ መሓዝ እግል ለዐድዩ እምተሓን ዐቢ ሳደፈዩ። መኪነት ዲብ ሽምሽም ዲብ ትጸበጥ ምኑ ሐለለቱ። ምን ሰውጉ ህይ እንዴ ትከረ ዲብ ሐንደዮት ጨበል ለለሓልፋ ወቅት በዝሐ። ለመኪነት ትርስ (ርዴተ) ምንመ ዐለ እተ። ዑብደልከሪም እበዩ ለኣምሩ? ሐቆ ንዳል ድቁብ ህይ እግል ሕሊል እንዴ ተዐዴት ዲብ ምድር ኤረትርየ አወልወለት። መኪነት ክምስል መጽኣት ለሕዳም ዲብ መዐስከር እግል መምተለካት ለዐቅቦ ለዐለው ምናድሊን እብ ሽፋግ እግል ሰለሕ እግል ልጽዐኖ ግረ ኢቤለው። ምስል ወቅት ዲብ ልትባደሮ እግል እት ብቆት ኩሩይ ለዐለ ሰለሕ እተ መንኪነት ጸዕነው።

ለዲብ መክዘን ዐለ ሰለሕ ዲብ መኪነት ትጸዕነ። ላኪን አዜመ ዲብ ወግም ለይኣተ ብዕድ መታክል ህሉ። እሊ ሰለሕ እሊ ምን ምድር ኤረትርየ አስክ ሕዱድ ሱዳን ከፎ ልኡቱ? መካይን ሽሕነት መደኒ ለትሰረረተ ሰለሕ አው ብዕድ ዐስከርያይ መምተለካት ለጸዕነት መኪነት አስክ ከርስ ሱዳን እግል ትኣቲ ለልትቀደር ይዐለ። ቡ ሰለሕ ለጸዕነት መኪነት አስክ ምድር ሱዳን እግል ትኣቲ ቃኑንያይ ሰበት ይዐለ። እሊመ አርወሐቱ ለቀድረ ብዕድ መሳእል እግል አንፋር ጀማሂር ገብአ። ሱዳንዩን ክእነ ላቲ ሰለሕ አስክ ሕዱድም እግል ለኣቱ ክሉ ረኣሱ ለልትቀደር ሰበት ይዐለ።

እትሊ ወቅት እሊ። ምን ተብሕ እንዴ ትባገሰት እብ ሽግለት እንዴ ትከሬት። ጋድም ዒለጸዕደ ድማን እንዴ አትሌት። ናንጌ ደብር ተክል ወዐሮብ እንዴ ሐልፈት። እብ መራት ወኖኖ አስክ ዐላኬብ ወምኑመ ሕዱድ እንዴ ተዐዴት ከርስ ሱዳን ተኣቲ ለዐለት ገበይ እብ ጄሽ አባይ ብትክት ህሌት። እት አካን እለ ገበይ እለ ለእብ ሰዔ-ሰዔ ለትሸቂት። እብ ረወሪት ዶብ ዲብ ተህንጦጥል እብ መሸንገል ትሩሩቅ እንዴ ሐልፈት አስክ ሐወልዕ ለትደንን ምኑመ አስክ ዐየት ለትትከሬ ገበይ ሐዳስ ቅፍርት ዐለት። እብሊ ገበይ እለ እንዴ ትጠቐካቱ ህይ ቅሮረ ምን

ግረ እብ ምድር ሱዳን ልትኣቲ ለዐለ።

ለአንፋር ጀማሂር ለሰለሕ እግል ለአንግፎ ዲብ ልትባደሮ እግል ሰለሕ ዲብሊ መኪነት ክምስል ልጸዐን ወደው። ህቶም ዲብ ልጽዕኖ ጄሽ አባይ እብ ጀህት ግብለት ወምፍጋር ጸሓት አስክ ቅሮረ ገጹ ገሰግሰ ሰበት ዐሉ። ለድቁብ እንረር ደባብ ምስለ ዐለ ዘብጥ መዳፍዕ እግል አንፈራም ጀማሂር ዝያደት እት ሽቀላት ካረዮም። አባይ እንዴ በድረዮም እግል ሰለሕ ወመኪነት እግል ኢልንዘዕ ምኖም ህይ ፈርህው። እብሊ ምህለት ለኢሊህይብ ቴለል ዐስከሪ ለጀማሂር ጀላብ ሰለሕ እት ልብሎ ኖሶም እት ብቆት እግል ኢልትካረው ፈርህው። ሚ ሊደው ላኪን? ምስል ወቅት ዲብ ልትባደሮ እግል ሰለሕ ምን ጽዕነት ወኪን ሕርያን ይዐለ እሎም። ላኪን ለሰለሕ ክሉ ክምስል ትጸዕነ አየ ገበይ እበ እግል ልሕለፍ ቱ? እብ ጀህት ግብለት አስክ ከረ ተቤሕ እግል ኢሊጊስ አገሙደ ጄሽ አባይ ለገበይ ዳብኦ ህሉ። እብ ጀህት ቅብለት ሕዱድ እንዴ ተዐደ ምድር ሱዳን እግል ኢልኣቱ ህይ ጄሽ ሱዳን እግል ገበይ ለዐቅብ ህሉ። ብዕድ ክራጅ ህይ ይህለ። ዲብ ክእነ ወርጠት ወመሳድድ ምሮ ሐጠር ወምርወት ለለሐዜ ብስር እግል ልትባሰር ዐለት እሉ።

ለሰለሕ ጸዕነት መኪነት ሕዱድ እንዴ ተዐዴት ዲብ ከርስ ምድር ሱዳን እግል ትኣቲ እብ ገበይ ቃኑንያት ለልትቀደር ሰበት ይዐለ። ለአንፋር ጀማሂር ምስለ ሰለሕ ለጸዕነት መኪነቶም ምንመ ትወረጠው። እግል እሊ መዋጥር እሊ እግል ለአርሁ ባሰረው። ጄሽ አባይ እት ባካትለ መዐስከር ምናድሊን ልሽሕግ ህሉ። ምን ዐላኬብ ወቅራር ቀየሕ ገጹ ቀደም ገሰግሰ ህሉ። መዳፍዑ ጀምህም ወደባቡ እት ለአንርር መጽእ ህሉ። ዲብ ቅርብት ነሳፈት ናይለ መዐስከር ህይ ባጽሕ ህሉ። ለኣንፈብያን ለጅንሰን ደባባት እንዴ ደግነዩ ዲብ መዐስከር አተዩ ምንገብእ ለምሔርበት ምስለ እት መኪነት ጽዑን ለህለ ሰልሐም እት ብቆት እግል ልትካረውቱ። ክርን ናይለ ዌረት ደባባት ምድር እት በጭብጭ ዲብሊ መዐስከርላ ምሔርበት ልሽሕግ ህለዩ። ሰረንመ እንትልፋፍ እግል ሊደዩ እንዴ አርሐበዩ እግል መዐስከር ዲብ ከርድናሁ መጽኦ ህለዩ። ለአንፋር ጀማሂር ላኪን ዝያደትለ አርወሐቶም እበ ሰልሐም ሹቁላም ዐለው።

እተ ወክድ ለህይ ምን መንዘማት ጀማሂር ክልኣት ነፈር ምሮ ናክር አቅረበው። ምን ልውሕድ ለክልኣት ግረኖፍ እግል ለኣድሕኖ ሰበት ሰተተው ምን እተ መኪነት ጽዑን ለዐለ ሰለሕ ለክልኣት ገረኖሽ

እንዴ ፈንተው እግል ልርፍዑው ወዲብ ደማን ለበ አካን እግል ለኣብጽሐው ጎማቶም በትከው። ለበዐል ነፍስ ሰኔት መሐመድለኢል በዩድ እግል ምሮ ገረኖሽ እንዴ ትሆገለ ትብገሰ። ለብዕድ ህይ ኣድም ክዕታይ ወወድ ፍሬ እግል ካልኣይ ገረኖሽ ጸረው። እብሊ ህይ ለክልኣት ገረኖፍ ረሻሻት ምን ረኣሰ መኪነት እት መርኩብ ናይለ ሰቡላም መንዘማት ጀማሂር እንዴ ተዐሮረው ምን መዐስከር አስክ ደብር ደምቦብየት ትወክለው። አዜ ዲብ ረኣሰለ መኪነት ታርፍ ለህለ ለ180 ግጥዐት ሰለሕ ከፊፍቱ።

ደብር ደምቦብየት ምን ቅሮረ እንክር ምውዳቅ ጸሓይ ለህሉ ሕዱድ ኤረትርየ ወሱዳን ለፈንቴ ደብር ሻንን ወእመርቱ። እት ሒን አውል ደምቀቱ ክምስል ዕማመት ለመስል ግዩም ሰበት ትገብቡ ዲብ ዐስተር ለለሽበ መስል። ለትፈናተ ዕጩይ ወሔዋንት ከደንመ እብ ብዝሐ በቅሉ ወንብሩ። እብ ጀህት ምውዳቅ ጸሓዩ ሐወልዕ ፈልሐት ወዐይተረ ለልትበህል ወእብ ጀህት ምፍጋር ጸሓዩ ህይ ተፍሌናይት ክርበ ገዕ ቃርሐቅ መፍለክ ውብዕድ ለልትበህል አካናት ህሉ። ለቅሮረ ክሉል ለህለ አካናት ህይ ከረ አሽህጌ ቀሮት ወድ ባናይ ቅራር ቀይሕ። ዐላኬብ ኣባጨቀት ሽርም ከልብ ውብዕድ እግል ልትሰሚ ቀድር። እሊ ክሉ አካናት እበ እቲ ሳክናም ለዐለው አንፋር ጀማሂር ወሰለለ ክምስል ኦጫብዕ እደዮም ሰበት ለኣሙሩ። ጄሽ አባይ እብ ሽፋግ እት ልትነህፍ እተ መዐስከር እግል ልኣቱ ኢቀድረ። ለአንፋር ጀማሂር እግል ክልኣት ረሻሽ እት መርኩብ ኣዳም ዲብ ልጸወሮ አስክ ደብር ደምቦብየት ሳርሕዎም እት ህለው። ምን ደምቦብየት ወኪን ላተ ዲብ እንሰ እንዴ ጸዕነው አስክ ድን ሰውረት እግል ልብጸሕ ምሽክለት አለቡ። ለዲብ ፈርህት ታርፍ ህለ ላተ ለዲብ መዐስከር እት ረኣሰ መኪነቱ ሽንን ለህለ 180 መንዱቅ ቱ። መሳእል ናይ እሊ ህይ ከፎ ሐል ረክብ ኮንዶእ!

ለሰለሕ እብ ተማመ እተ ፒክ ኣፕ ጽዑን ምንመ ህሉ። አስክ አየ እግል ሊጊሰቱ? እበዩ ህይ ልሕለፍ? መኪነት እንዴ ረፍዐክ እብ ድኦብር እግል ትፍገር ሱዱ ቱ። አባይ ጄሹ ደባቡ ወመደራዳቱ እንዴ ጸብጠ ምን ዐላኬብ አስክለ መዐስከር ልሽሕግ ህሉ። እግል ልዝበጥመ እምቡት ህሉ። እት

ክእነ ላቲ ቴለል ለመኪነት ምስለ ራፍዐቱ ለህሌት አስለሐት እንዴ አንደድካህ ሀረብ ለሐይሰ ወለ ምስል ሰልሐ እግል ሕኩመት ሱዳን ሰለሞት? ለልብል ሰኣል እግል አንፋር ጀማሂር ረበሸዮም። ዲብ ደንጎበ ላኪን ‘ተናን ወፋርስ ምፍጋር ኢለሐግሎ’ ክምስለ ልትበህል። ለሐስበው ብስር ክምስል ክራጅ መስለ እቶም ወእሉ እግል ሊደው ህይ ነወው። ለአንፋር ጀማሂር እግል ብስርም ለትሸሬሕ ተምሲልየት እግል ልመስሎ ትፋህመው። ምን አግደ ከዋኩብ ናይለ ተምሲልየት ህይ ለእብ ግዝፈ ለተሐራት ምናድለት ፍረወይኒ እግል ትግበእ ተሐራት። ሰበቡ ለብዕዳት አዋልድ ቀንጭብ ሰበት ገብኣዩ ዲብ ረኣሰለ ሰለሕ ክምስል አክረረዩ ለሰለሕ እግል ልሕባህሁ ኢቀድረ። ላኪን እግል ፍረወይኒ ዲብ ረኣሰለ መንኪነት እንዴ ጸዕንካህ ሳረሐት ሌጦ ኢኮን ለብስር ወተምሲል።

ለነፈር ጀማሂር ላተ ምናድለት ፍረወይኒ ዲብ ረኣሰለ ሰለሕ ጽዕንት ለዐለት መኪነት ቱንደት እንዴ መደው ዲቡ ክምስል ትሰክብ ወደው። እሊ ልትበህል እት ህለ ላኪን ለዲብ ለሐናዴ መጽኦም ለዐለ ደባብ አባይ ምን ቅሩብ ልሰመዕ ዐለ። ፍረወይኒ ክምስል አክረረት እብ ላመት መሓዊተ እግል ልዋትቦ ወልባሰ እብ ደም እግል ለሐንግሮ ትዋፈቀው። ለፈሸሽ ዐለ ደም ጀላብ እግል ልብዘሕ እሎም ብዕዳምመ እግል እብ ደም ሹሀደ ለመጽኦ ሰለሕ እግል ልድሐን ቡ እንዴ ቤለው ለትፈናተ ክፈል ገርቦም እት ለሃልቦ እግል ልትከዴ ለዐለ ደም እግል ለኣብዝሐው አስተብደው። ዐጃይብቱ! እብ ደም ምሔርበት ለተረበ ሰለሕ እብ ደም እግል ልድሐንቱ ለበርናምጅ። እግል ጸነብል ወአጭርቅ እብ ደም እንዴ ሐንገርዉ እገር ወረኣሰ ፍረወይኒ ዓሸበው እቡ። እብሊ ህይ ገሮብ ፍረወይኒ እብ ደም ለትመየሰ ሽለትት ተዓሸቡ። ረኣሱ እገረ ክሉ እብ ቀናብል ወርሳሰ አባይ ለትገራደመ መስለ። ፍረወይኒ ምን ቃብል ለልርእዩ ለተሐዬ ኢትመስል። ለሰኣል የምክን ሕክምን ተብጸሕ ሚ ኢትበጽሕ ለልብልቱ ለዐለ።

ዲብ ገጽ 2 ልተላሌ...



ቅሮረ ሱዳን

መድረሰት ፈንዩት ዊነ ማሌ ወዮም



አሰይድ ቃልኣብ ዘርኡ

ሰኣል፡ ምስል ሃም ከልፍየት ናይ እለ መድረሰት እግል ተትአምረን?

መድረሰት ፈንዩት ዊነ እት 1985 ዲብ አራግ ለትትበህል ኣነን ለትአሰሰት እት ገብኤ፡ እብ ሐምስ መጃላት በህለት እብ ዕመማይ ኣሸቃል ሐጺን፡ ሕዳደት፡ ኣሰነዮት መካይን፡ ንጃረት ወክርህበት እብ ደረጃት ዲፕሎም በርናምጅ ኣሰብዔት። ሐቐ ሕርየት ህዩ እት 1997 እንዴ ኣሰብዔት ጥውር ብንዩት ትሕትዩት እንዴ ገብኤ እሌ፡ እትለ ኣዜ ለህሌት እተ መዲነት ነቅፈ ዶረ ዲብ ኣውፊዮት ትትረከብ።

ቀደም እሊ ላኪን እለ መድረሰት እስክ ካምል ብንዩት ትሕትዩት ልትሸቁ እግል ደረሳህ እት ለትፈናተ መዳርስ እንዴ ትፈንጠረው ድራሰቶም እግል ለአተላላ እቡ ለቀድሮ ኣግቡይ እብ ነዘዋት፡ እስክ ማይ ሓባር እንዴ ትለክከው መድረሰቶም ክም ለአተላላ ጋብኡት። ብነ ክም ተመ ምን 2000 እስክ 2008 ናይ ደረጃት ዲፕሎም በርናምጅ እቡ ኣሰተብዔት።

ሐቐ እሊ በርናምጅ እሊ እብ ድግማን እንዴ ትረኣ ምን 2008-2009 ደረሰ ምን መድረሰት ዋርሳይ-ይክአሎ ሳወ እምተሓን እንዴ ወደው ንቅጠት መሕለፊ



እግል ኢረክበው ካልኣይ ፍርሰት እንዴ ተህየበ ናይ ሸሃደት በርናምጅ እግል ተህብ ኣሰብዔት። ምን 2011 እስክ እለ ህዩ ደረሰ 10ይ ፈሰል ሐቐለ ኣትመመው እግል ክልኡ ሰነት (11 ወ 12) ፈሰል እብ ድረጃት ሸሃደት ዲብ ኣድረሶት ህሌት።

ለትዕዮት ድራሰ ህዩ እት ረኣሰለ ቀደም እለ ለእምቤሉ ሐምስ መጃላት እት 2008 ሰለሰ ማዳት እንዴ ትወሰከዩ ተክጢዋ፡ ብነ ወሀንደሰት ተኣደርስ ህሌት። ሰበት እሊ ኣዜ ሰማን ዎርክ ሾባት ኣው ውረሽ ህለ እግል።

ሰኣል፡ ዲብ መትከየት ደረሰ ለትትበው መቀየሲታት ሚቱ?

እት ሐንቴ ቅሰም ቴክኒክ ናይ ወዛረት ተዕሊም ለትትክምክም ሰበት ተ፡ እብ ኣሳሰ ለቅሰም ለኣፍገረዩ ቀዋኒን እግል ቲጊስ ሰበት ህለ እግል፡ እግል ክል ኣቅሊም ዐድኑ፡ ዐደድ ከም ልትህየቡ ትወዴ። ለኣቃሊም ህዩ ለዐደድ እንዴ ረኣው እት ምዴርያት ወመዳርስ ሰነውያት እንዴ ከረው እበ ሕነ ለእንጠልቡ ብዝሐ ደረሰ ምነ መዳርስ ለተሐረው እትለ መድረሰት ለኣቱ።

እብ ተውሳክ ደረሳይ ኣርወሐቱ ለራዔ እግል ልግበእ ህለ እሉቱ ለእምብል። ሰበቡ ሐትሐቱ ዶል እብ ሸቅል መማኒቶም ሰኒ ነኣይሸ ደረሰ ሰበት መጽኡኑ ኣሰክ ሕጽቤ ልባሶም ለኢቀድሮ ሰበት ገብኤ፡ እብ ዐቅል ወጀሰድ በቅዓም እግል ልግብኦ ህለ እሎምቱ ለእምብል። ከምሰልሁመ ተቅዩም ንቅጠት ደረሳይ ምን 65% ወለዐል ዶል ገብኤ ለበክት ፍቱሕ ቱ።

እለ መድረሰት እለ ምን ብዕድ ፍንጽይ እግል ልውደዩ ለቀድር ሚቱ?

ዎር እግል ንትረሰው ለኢወጅብ ሐቃይቅ ህለ። ህቱ ህዩ ዎር ምን ብዕድ ፍንጽይ እግል ሊደዩ ለቀድር

እብ መቃብለ ምስልክ ለህለ ወእት ብዕድ ለኢህለ እግል ተኣጀግሩ ሐቐ ጀረብካቱ። ዲብ ብዕድ ለህለ ሸይ እትክ ለኢህለ እግል ልግበእ ቀድር። እሊ ህዩ ጠቢዒቱ።

እብ ኣሳሰ እሊ በጋ፡ እብ ሃም ልትርኤ እት ህለ፡ እለ መድረሰት ዲብ ሐንቴ ቅሰም ቴክኒክ ኣሰክ ህሌት፡ ምስል ክለን ታንጃታተ መዳርስ ሰውይ ከደማት ወእህትማምቱ ለገብኤ እግል። ላኪን ፍንጽይ ጀዋንብ ብቐዕ ህለ እለ እግል ኒበል እንቀድር። እት ነቅፈ ሰበት ህሌት ደረሳህ ካምል እህትማም እት ተዕሊም ሌጠ እግል ልውደዉ ኣተቅደረዮም እግል ልትበህል ቀድር። ደረሰ ምስል ዓይላቶም ለህለ እግሎም ቅርብ ወተእሰር ሰኒ ሕዱድ ቱ። እብ ሪም ልትቀየስ እት ህላመ ለምኑ መጽኦ ኣማክን ሰኒ ረዩም ሰበት ገብኤ፡ ምስሉመ እክ ገበይ ወመሐገዝ መዋሰላት ሰበት ህለ እት ዐዶም እግል ለትቀባብሎ ሰዱድቱ። እሊ ህዩ እግል ደረሰ ክምሰል መሻክል እንዴ ኢልትረኤ ክምሰል ጃንብ ብቐዕ እት መድረሰት እግል ልረክዞ ለሰዴ ቱ።

እሎም ደረሰ እሎም እተ ልትህየቦም ናይ ሰር ሰነት እጃዘት ኢገብኤ ምንገብኤ፡ ወለ እት ሰነብት ዐድ እግል ኒጊስ ለልብል ፍክር ሰበት ኢህለ፡ ክሉ እህትማም እት ተዕሊም ቱ። እለ መድረሰት ምነ እብ ንዝምት ገበይ እግል ተኣተላላ ለወደዩ ጋር ህቱቱ። ዲብ መድረሰን መ ከምሰልህ፡ ምን እሊ እበ ለኢልትፈንጽ ኣግቡይ ሰነት ካምለት ምስል ደረሳሆም እንዴ ገብኤው ወቅቶም ሰበት ለሐሉፋ ዕላቀት ደረሰ ወመድረሰን እግል ትደቀብ ለአተቅደራ ቱ። ሰበት እሊ፡ ሪም መድረሰትን ክም ዎር ኣግደ ጃንብ ሰልቢ እንዴ ኢገብኤ ክምሰል ጃንብ ኢጃቢ ምስልትረኤቱ እግል ኢበል እቀድር።

ሰኣል፡ ምን እለ መድረሰት እንዴ ፈረው እት ሸቅል ለትፈረረው ደረሳኩም ከም ገበኦ?

እለ መድረሰት እለ ምን 1985 እስክ እለ ለሐልፈት ሰነት ለኣድሐረቶም ብዝሐ ደረሰ 2602 ቶም። ምን እሎም ለ 646 ኣዋልድ ኣንሳት ተን። እስክ እለ

እብ ደረጃት መድረሰት ለወዴናሁ ድራሳት ይህላኒ። ላኪን እተ ኣወል ግርም ዕላቀት እግል ተህሌ እግልን ቃድረት ዐለት። ሰበቡ እበ ለደርሰዉ መጃል ልትወዘፎ ሰበት ዐለው እግል ትርከቦም መሻክል ኢዐለ።

እትሊ ኣዜ ወክድ ላኪን ምስለ ለህለ ሐዲስ ኣግቡይ ወዘፎት እብ ኣኪድ እተዩ ወእተዩ ትወዘፈው እግል ንኣምር ክቡድ ቱ። እብ ዓመት ላኪን እብሊ ፍሩዕ ፈንዩት ለትደሐረው ደረሰ እት ሸቁል እንዴ ተሓበረው እበ ደርሰዉ ምህንት ምህም ወራታት ለኣወቁ ህለው እግል ልትበህል ቀድር።

ሰኣል፡ እት መጃል ድራሳት ኣካደምየት ህዩ ክኣፎቱ ኣግቡይኩም?

ደረሰ እት ወራታት ምህንት እንዴ ኢልትሐደዶ እት ተዕሊም ኣካደምየት መ ለለደምየ ወነቲጀት ሰኔት እግል ልርከቦ እለ መድረሰት መጥመርሰ ተእሂል ምህንት እብ ምተራድ ለትሸቁ እቡቱ። እብ ኣሳሰ እሊ፡ ደረሰ ሕሰስ ሂገ እንግሊዝ፡ ኣምር ሕሳብ፡ ኣምር ቀመም

ወፊዚክስ ክም ደርሶ እንወዴ። እተ ናይ ምህንት ተዕሊም እግል ልሰደዮም ለቀድር ዎር ናይ ፈንዩት ሰወር (Technical drawing) ክምስላመ እንወዴ። ዎር ሸኦ እንዴ ኢሸቁ ኣሰልፍ እብ ሰወር እንዴ ረሰመው እግል ልጽንሖ ሰበት ሰዴ፡ እት ፍዕል እግል ኢልክበድ እቶም እሊ በርናምጅ እሊ ልትህየቦም።

እምተሓን ወጠኒ በህለት (ማትሪክ) ሰበት ለኣምትሕኖመ ለብዕድ ኣካዳሚያይ ወጅህ እትገብኤ ሐቐ እምትሓን መብሸር እስክለ ተእሂል ፈኒት ሰበት ለኣቀብሎ ምነ እብ ፍክር ወእብ ዐመል ለገብኤ ተዕሊም ለትፈንተው ኢትኒ። ምስል ኣድረት ሓለት ተክኖሎጂያይ ተጠውር እግል ልትኣመሮ ህዩ ክም ተውሳክ ናይ ኮምፕዩተር ተእሂላት እንዴ ዳለ እት ክልኡ ድፍዐት እንዴ ትካፈለው basic computer application ምስል auto cut design እንዴ ኣጸበዋን ክም ደርሶ ገብኤ። እትሊ ቅሩብ ወክድ ህዩ ሐዲስ ታሰባይ መጃል ተዕሊም እግል ነኣምብት ክም በርናምጅ ጽቡጥ ህለ።

ልተላሌ...

ልእክት ምን ኤረትርዩን ደረሰ ዉሃን - ቻይነ

ሰላመትን ዲብ ዓይላትን ወክሉ ሸዑብ ኤረትርዩ
ሕነ ዲብ ዉሃን ለህሌነ ውላድኩም ክልነ ዓፍየትን ሰኔት ክም ህሌት እግል ነኣክድ እግልኩም እንፈቱ። እትሊ ወክድ እሊ ለዐለት ሓለት ዲብ መራቀበት እንዴ ኣቱት ለቴለል ልትህወን ህለ።

ለክል ዎር ምን ቤቱ እግል ኢልፍገር ለልሐዝር ኣዋጅ ክልኣት ወሬሕ እግል ለአተላላ ምንማቱ፡ ጀለ ደሐንን ምንገብኤ እምበል ጨቅዋ እንዴ ትክበትናሁ ንተለዩ ህሌ። እለ ምን ወዴነ ህዩ ሰሊማም ህሌ። ምን እለ ለንትዐለመ ጋሪት ምን ተህሌ ጀለ ደሐን እብ ማርሐት ወምኤምረት ዓፍየት ለልትህየብ መምሬሕ እት ዐመል እግል ልተርጀም ዋጅብ ወመስኡልየትቱ።

ለዲብ ክለ ዐለም ልልዔ ለህለ ሻይረስ ወጠንናመ እብ በቃዐት እግል ትጋብሁ መዳላይ ዋድየት ክም ህሌት ኣምራም ሕነ። ምን ሐረስ እሊ ሕነ ዲብ ዉሃን ለህሌነ ኤረትርዩን ደረሰ፡ ምን ብዙሕ ሸዑብ ለወደዩ እነ፡ እለ ሕድት እት መጥሩ ወሕኩመቱ ክም ህሌነ እሻረት ትገብኤ እነ ለእንቢለ ናይ 3,200 ዩዋን እት መዳፈዐት እሊ ሻይረስ ለትውዕል ሰዳየት ነህይብ ህሌ።

ካልቅ ምን እሊ ዐለም እት ብቐት ካሪ ለህለ ሻይረስ ዐድነ እግል ልሕጃብ እነ ዲብ ንትደዴ፡ እብ ፍንጽይ እግል ንትፋዩ ለነሐዜ፡ ለእብ ሕክመት፡ መርሐቱ ወምኤንረት ዓፍየት ለልትህየብ መምሬሕ ወሐብሬ እት መዓሉ ኣውዐልናሁ ምን ገብኤ እሊ ሻይረስ እት መራቀበት እግል ተኣቱ ቀሊልቱ። እለ እንዴ ኣመርነ ክሉ ለልትህየብ ተውጂህ ኣማነትኩም እት ዐመል እግል ነኣውዕሉ እንብል።

ሄኖክ ንጉሲ
ወክል ደረሰ መዲነት ዉሃን - ቻይነ



ሓምድ እድሪስ ዐዋቱ

ለእብ ሀይሌሰላሴ ወልዱ ለትኩብ ወእብ ከልሹም መሐመድ ለተርጀመ “ሓምድ ዐዋቱ ምንቱ?” እብ ልብል አርእስ እብ ትሉሉይ ዲብ ጀሪደት ኤረትርየ ሐዳሰ ፈግር ለህላ ክቱብ ምን ምዕራፍ ሴዕ 11 ክፈል እግል ገርኤ።

1 ሰብተምበር 1961

ሓምድ ዐዋቱ ምን ቤቱ እንዴ ፈግረ ምስል ሰሰ መልህያሙ እት ሀደምደሚ ሰልፋይት ጠልገት እንዴ ለክፈ ንዓል ክም አንበተ ለበሽረ እተ ዕለት ሰበት ተ፡ ሽዑብመ ክል ሰነት ለልትዘከረ ወለልሐሸመ አምዕል ተ። መዐረከት አዳል እት የም 1 ሰብተምበር 1961 ክም ገብአት ወክም እንበተት ንዓል ሰለሕ ለልሐሰብ ህለው። ምናተ፡ ለቀዳምያም ምናድሊን ለመዕረከት አዳል ገብአት ዲብ ዕለት አማን፡ ሄለል ሰብተምበር እንዴ ኢትገብእ፡ 26 ሰብተምበር ክምሰል ዐለት ቱ ለሸርሐ። ምነ ናዮም እብ ኢትትፈንቴመ፡ ጀሪደት ዘመን “ፖሊስ እት ረአሰ ቴልየት ሓምድ እድሪስ ዐዋቱ ለረክበዉ ዐውቱ” ሐንቴለ ልብል አርእሱ፡ እት ናይ ጅምዐት 29 ሰብተምበር 1961 ጥብዐተ፡ እግል እሊ ተ ለአከደት።

...አትላት ገጽ ምሴ፡ (26 ሰብተምበር) ዐሳክር ፈደሬሽን ምን ሰንበል ለትለአከው መሓርበት ኬይደት-ቃኑን ላቶም ፖሊሴ ምስለ እብ ሓምድ እድሪስ ዐዋቱ ለልትበህል ሽፍታይ ለልትመርሐ ድድ ቃኑን እንዴ ተሓረበው፡ እግል ቤረቅ ኖራይ ለልትበህል እናሰ ቤት መዐለ (ቢንዓምር) ምስል ምርት መነሸር ለጅንሱ መንዱቁ ወ 14 ጠልገት ጽብጣም ህለው።

... እሊ ሽፍታይ እሊ፡ ምርት ምነ እዴ ማን ናይ ሓምድ እድሪስ ዐዋቱ ለዐለው ቱ። ምድር ጽልሙት ሰበት ዐለ፡ ለአካን ህይ፡ ደብዐት ሰበት ተ፡ ፖሊስ እግል ተርፈው እግል ለዐሩባም ኢቀድረው። ላኪን፡ ቤረግ ኖራይ እግል መትቀዳም ቅወት ፖሊስ ለትነፊዕ ወትሰዴ ሐብሬ ወመፋሂም ሃይብ ህለ።

እትሊ ከበር እሊ ቤረቅ ኖራይ እንዴ ትበህለ ስሙይ ለህል (ዑሰማን ቤረግ) ክም ትጸበጠ አኪድ ቱ። እግል አግደ ጽበጠ ምን እንረኤ ህይ፡ መዐረከት አዳል እት የም 26 ሰብተምበር 1961 ክም ዐለት ቱ ለትሸረሐ።

ሰለሕ ከረ ሓምድ መብዝሐ አልቢኒ ዐለ። አልቢኒ (አቡ-ኸምሰ) እት ክፋል ሐባሪሁ፡ እግል ሀደፍ ተንሺን ለነፈዐ ክልኤ ሰነን ፍግር ለቤለየ ነጻይሽ ምዋመዕ ሐጺን ሰበት ብእቱ፡ ሓምድ አዛኒት እት ልብል ቱ ሰምዩ ለዐለ። እሉ እንዴ ሰማ ቱ ህይ ለምዕል፡ “የም አዛኒት ክርን ወዴት፡ ወእለ ሕነ፡እግል ሰልፍ ኢነት ሕነ ወአባያምን ገጽ-እብ-ገጽ እንዴ ትዋጅህን ከትሓረብን። ሐቆ እለ ሰነብ እት ዐራት ይህለ!” ቤሊ፡ እግል ገሌሁ አዳም ለሰሐለት ወእግል ገሌሁም ለአግበሐት አምዕል ጀርቤ፡ እግል 26 ሰብተምበር 1961፡ ክም ዕውትት ወታሪካይት አምዕል

እት ኖተት እብ ሕሸመት ከትብዩ ለልትበህል።

አዳል እት ሞገራዬብ ለህለ ተረተር ወዐቢ ደብር ቱ። ምን ቅብለት አሰክ ግብለት ልትመደድ። ምን ጀህት ምውዳቅ ጸሓዩ ምን ሀይትተተሰነይ እንዴ ትበገሰኩ፡ አሰኩ ለትአፈግር ሰለል ጨባብ ህሌት። ብለቅ ወመድሮረይ ለትመለኦ አጸድፍ ሰበት ቱ። እምበለ ውላድለ ባኮት እንዴ ዘግነ ለፈግሩ አለቡ። ገሌ አካናቱ አዳም ኢኮን፡ አጣልመ ኢፈግሩ። አዳል ለትፈናተ ዕጩይ ወግሬ ወቀረጽ ለብእቱ፡ እብ ዕጩይ-ልባን ለትገልበበ ምድር ሰዐር ቱ። እቱ ለአተ፡ አዳም ኢኮን ንዋይመ ኢልትረኤ። ማይ አዳል ጋሽ እብ ቀሊል እተ ኢረክቡ ፍንቱይ አልቁቡ-እተም ቱ ለልትረከብ።


እብ ጀህት ግብለት አዳልመ ሐቱ ገበይ ሌጣ ተ ለህሌት። ክምሰለ እት ቅብለቱ ለህሌት፡ ህታመ እት ሐሰያት ተ ለህሌት። ርሽመት ደብር አዳል ሐንታለ ትትበህል። ምን ሐንታለ ክም ደነንክ አጋርተ-ፋረ (ገበይ አገር) ትበጹሕ። እንሰ እብ ሐቱ ሰለል አሰክ አጋርተ-ፋረ እግል ትፍገር ትቀድር። ምኑ ገጽከ ለዐል ጸባብ ወአሰ ሰበት ገብአት፡ እንሰ ኢትፈግረ። አሰክለ ቀንጸት ምኑ ቤለደሬ እግል ተአቅብል አውመ አሰክ ምውዳቅ ጸሓይ አሰክ ግራሽ እንክር ሀይትተ እግል ትንሰእ ቤ። ምኑ ህይ አሰክ አዳል እምበል አጣል እግል ልፍገር ለቀድር ንዋይ ኢህለ።

እት አዳል ክም ፈገርክ እብ ጸርግዩ ሀይትተ-ጎኜ ለልሐልፍ እብ ዋዴሕ እግል ትፈርጉ ትቀድር። ላሊመ አሰክ ባናታት አንዋር ከሰለ እንዴ ኢተርፍ እብ ዋዴሕ ሰበት ልትረኤኩ፡ መርበይክ ኢቤዴ ምንኩ። ግብለታይ እንክር አዳል እግል ኖሱ አሰክለ ጸርግዩ ቱ ለልትመደድ።

እት አዳል ለትፈናተ ሐዋናት ከደን ክም ነላት፡ አራባት፡ እምበርሀን፡ ዔው፡ ወነን፡ ሐየት (እት ዘበን ቅዱም)፡ ከራክሬ ወሐገል እብ ብዝሐ ህለ። እት ርሽመት አዳል ነጻይሽ ቀርዋት ምን ኢገብእ፡ ከረቢት ለትመለኦ ቱ። አዳል እብ ጀህት ምፍጋር ጸሓዩ ወቅብለት ምፍጋር ጸሓዩ፡ አሰክ ሞገራዬብ፡ ጀህት ቅብለት ህይ አሰክ ሀዋሻይት ከሬኩ።

አዳል ሓለት ሀወእ ሰኔት ሰበት ቡ፡ እት ወክድ ሐጋይ ገሌ ሰብ ንዋይ ለሓት ዲቡ። ወክድ ከረም ላኪን፡ ዔቶት ከደን ሰበት በዜሕ ዲቡ፡ ለኢትዘግን እቱ ምድር ክጠረት ቱ። ፖሊስ አሰክ አዳል እግል ልፍገር ሐቆመ ጀረበው፡ እብ ምንቀደም እብ ጀህት ሀይትተ፡ እብ ሓራት ህይ እብ ቤለ-ደሬ እግል ልጀርቦ ቦም። እብ ክልኤቱ እትጅሃት አሰክ አዳል እግል ልፍገር ለወጠኩ፡ ዝያድ አርበዕ ሳዕት ነስእ ምኑ።

ሐቆ ሐርብ አዳል፡ ለበዝሐው ምን ዴሽ ሱዳን እንዴ ትሳርሐው እት ከሰለ እንዴ ትገሰው መናዱቅ አሰክ መጽእም ልታከው ለዐለው መዋዋኒን፡ “አዜ ሚ ኒዴ፤ ሓምድ ሰለሕ ጥወር አለቡ፡ ለእሉ ረክብ



እልናመ ናይ ሰኒን ቀዳም ወሐድ ቱ። ከንትለዩ ገብእ መ ንጽነሕ።” ለልብል ሰኣላት ሀረሰው። ትም እት ልብሎ እግል ኢለዐርዉ፡ ምን እድሪስ መሐመድ አድም እጃዘት ሐዘው። ምን ሓምድ እግል ኢልእዘዋመ ዔብ ገብአት እቶም። ወሐር ክልኦት ለልትለኦት እግሉም አንፋር ሐረው። ህሌን ምስልክ እግል ሊበሉ፡ ዐብደለ እድሪስ ለልትበህል መዋዋን ጥለግ አሰክ ሓምድ እግል ለኦብጹሕ፡ መሐመድ አድም ገሰር ህይ አሰክ ካይሮ እጃዘት ለልትሰኣል።

ዐብደለ እድሪስ እብ ልብሉቱ ምን ገብእ ወሄራሩ ምስል ሽዑብ እግል ልትመሳሰል ለቀድር ወለባካት ሰኒ ለልኦምር ቢንዓምራይ እንዴ ትበህላ ቱ ለትሐረ። ምንለ ዐለው እቱ መዐሳክር እብ ሐምሐምስ ወዐሰዐሰር እንዴ ትዛበው ካርያመን ለጸንሐው 75 ጠልገት እንዴ ነስኦ ትበገሰ። እተ መደት ለህ እሊመ ብዙሕ ቱ፡ ዐብደለ እድሪስ እብ ልኡኩ ሚዳን አተ። ምናተ እት ለአንገጌ እግሉ፡ እግል ሓምድ ዐዋቱ ኢረክበዩ። እት ድብክ-አልገዴን ክም በጽሐ እግል ዐብደለ መሐመድ ዓምር ለልትበህል ነፈር አሚን ለአክ ዲቡ ከአቅበለ። እሊ ጥለግ እሊ ምን ከሰለ አሰክ ሚዳን ለትነደኦ አወላይት ራድኢት ቱ ለዐለ።

ከረ ሓምድ፡ እብ ሰብብ ሕዳን ጥለግ፡ ሞሉኮ ልትነፍያ ሰበት ዐለው፡ እግል ሐቱ ጠልገት ሐዳሰ አካን አልፍ ገንሕው ዐለው። ሽዑብ እት ከደን ለረክበዩ ጥለግ ጥልያን ልግበእ ወእንግሊዝ፡ እግል ከረ ሓምድ ነፍያም ገብእ እት ልብል ለአርዩ ከእት መአኩብ ለአጸንሐም ቱ ዐለ። ህቶም ህይ፡ እግል ሽባህ ቱ ለቤለው፡ ተረርፍ ናይ ካልኦይ ሐርብ እዲን እብ ዝላም ወጸሓይ ሰጉር ለረከቡ ጥለግ፡ ለልኦደሚዕ ምንመ ኢገብእ፡ እት መደት መሕገዝ ነፊዕ እንዴ ቤለው እት ሽነጦም ለአኩብ ወለኦምሆ’ሉ እቡ ዐለው። ሐሸው (ባሩድ) እንዴ አፍገረው ምኑ ልትነፍያ እቡ ሰበት ዐለው ኢለኩፋ። ከአፎ ክም ለአሸቅዉ ናዮም አብሳር ዐለ እሉም። እሰልፍ እብ በሰር እግል ዐረር ምን ኩብሰለት በይነ ወድወ። ሐቆህ እት ረአሰለ ዲብ ቀብተ ለጸንሐም ሐሸውት፡ ክም መንደዴ ለትገብእ እሉ ክርቢት ወሰኮ ዲቡ ከሐር ረአሰለ ጠልገት (ዐረር) እት አካኑ በሉሱ ወለክፎ

እቤ። ለአደሚዕ እሉም ዐለ ህይ። እለ ሽቅለት እለ ምን በዲር ለጸንሐት ወእብ ፍዕል ለልትሸቁብ እት ገብእ፡ ክእነ ለመሰል በሰር ሞሉኮ ልቡሉ ዐለው። ወድ-ጅግረ ለልትበህል ኖዕ ናይ መንዱቅመ እብሊ አብሳር እሊ ሸቄ ዐለ።

ለካልኦይ ልኡክ መሐመድ አድም ገሰር እማነት እንዴ ትከበታቱ ለትበገሱ።

ካይሮ ክም በጽሐኩ፡ ክሰሰን እግል ምን ዐድ አሰክ መሰር እት ገይሰ እትለ እንዴ ሸክፈ ዲብ ለመጽኢነ ከሰእየት ለሀቤነ ከሐልፈ፡ እድሪስ መሐመድ አድም እንዴ ረኩብኩ፡ “ሓምድ ከደን እንዴ ፈግረ ልትሓረብ ህለ። ንትለዩ ወለ ሰለሕ ብዝ አሰክነ ለትልእኩ እግል ንትጸበረከ።” እንዴ ቱሉ፡ “እለ ልእከት እለ ምንለ አፋነ እተ እዝኑ ተአበጽሐ። ለእሉ ለሀይበክ በሊስ እንዴ ነስኦክ ህይ እብ ሽፋግ አቅብለነ ለትብል እማነት።

ገሰር ምን በዲሩ እት ካይሮ ደረሳይ ሰበት ዐለ፡ እበዩ ክም ተኦቱ ወትፈግር ለበዴ ምኑ ነፈር ይዐለ። ምድር ለልኦምር ወሻፍግ ክም ቱ ምን አምነው ቱ ህይ ለልኦከው። እብ ሽፋግ እንዴ ትገበሰ ካይሮ ሰበት አተ፡ ለልኡኩ ኢትአከረ እቡ። ለቴለል ላኪን ክምለ መሰኢቱ ኢጸንሐ። ክምለ እለ ሐድገዩ እንዴ ኢገብእ፡ ኩሉ እንዴ ትቃየረ ሰእየት ለልኦበትክ እንዴ ገብኦ ጸንሐዩ።

አሰይድ ወልደኦብ ወልደማርያም በይኑ ሸቄ፡ ሼኽ ኢብራሂም ሱልጣን በይኑ ወእድሪስ መሐመድ አድም ከማን እብ በይኑ። ሰልሲቶም ዙዐመ ኦሮትክ ገበይ ሕርየት በይኑ እት ለሐዝዩ በንበን ሸቄ ጸንሐው። ምን ናይ እሉም ለልኦኬ ህይ ናይለ ደረሰ ካይሮ ቱ። እግል ኩሉም ምን ትፋሀመ ምስሉም ትቀየረው ዲቡ። ኩሉም ምርትክ ጽግዑ እግል ለዓቤ፡ እሊ ቱ መትጋድላይ፡ ለሀይ ቱ ለጊጉይ፡ እት አማን ለሀለ ፍላናይ ቱ እት ልብሉ ሰበት ሸርሐው እሉ፡ ሸይ ክም ትኬለመ ፈሀመ። እለ ዶል እለ ገሰር፡ “ምን ሕኔት እግል እድሪስ መሐመድ አድም ሌጠ ልእከቼ እንዴ አብጸሐኮ አቀብል፡ ሰልሲቶም ዕጋል እግል እርክዩም ቀረርኮ” ልብል።

ገሰር ሻሁድ ለገብእ እሉ እት ካይሮ ነብር ለዐለ አድም እድሪስ ኖር እንዴ ነስኦ ጌሰዮም። እሰልፍ እግል አሰይድ ወልደኦብ ወሐቆሁመ እግል ሼኽ ኢብራሂም ሱልጣን ኦሮቶምክ በይኑ እንዴ ረክበ ትፋሀመ ምስሉም።

አነ ምን ከሰለ እንዴ ትለኦኮ ማጽእ ህሌኩ። ንእበዩ ወንፍተዩ ለንዓል እንበት ህለ። ከረ ሓምድ ዐዋቱ ሐርብ አንበተው ወሐበት ምን ዐፍሽ ወሰዳይት ይህሌት እሉም። አዜ እንቱም ሚ ቱ ስታትኩም፡ ወሚ በሊስ እንዴ ጸበጥኮ እግል አቅብሎም።” እት ልብል ትሰኣለዮም።

... “ንሰዴ እንዴ እንቤ እብ ውቁል ኢንትሃጌ ወይእንሰዴ እንዴ

እንቤመ ኢንትሃጌ” እት ልብሉ መውቀፍ ምግባይ ጸብጠው። ለንዓል እንዴ ሸፍገ አንበተቱመ ኢትረይሐው እሉ። አሰይድ ወልደኦብ “እትሊ ወክድ ጎነ እት አንበተት ግድለ ሰለሕ ሽዑብ ፈዛዐት ካፍየት ቡ መሰለኩም።” ልብል እት ህለ፡ ሼኽ ኢብራሂም ሱልጣን ህይ፡ ‘ለእንበት ህለ ንዓል እብ እድሪስ መሐመድ አድም ለልትቀወድ ሰበት መሰለ እቱ፡ “ግድለ ሰለሕ እንቱም አንበቱ ውበዕዳም ለአንበቱ እብለ ኢከሰሱ፡ ሽዑብ ኤረትርየ እብ ኖሱ እግል ሐቁ እግል ልናድል እግል ልትጸገም ቱ” እንዴ ቤሊ፡ ገጽ ከልኤኒ።

እግል ገሰር ህይብት ለዐለት አግደ ፊነ (እማነት)፡ እግል ልእከት እት እድሪስ መሐመድ አድም አብጽሐት ተ ለዐለት። እግሉመ ጌሰዩ፡ምን ዐድ እብ ከሰለ ተሐልፍ እት ህሌክ ገለድ ለበይኦክ እሉም ምን ዴሽ ሱዳን ለትሳርሐው ህለው። ሓምድ ህይ እንዴ ፈግረ እት አዳል ሐርብ እንበት ህለ። አዜ ሚ ቱ ጸገም፡ እብ ብትክት በሊስክ እታኬ ህሌኩ፡ ቤለዩ። እድሪስመ ክምለ ቀዳምያም “ላኪን ሸፍገው እቱ” ቤለ።

“አነ ሸፍገው ሚ አከረው ይኦምር። እብ ልኡክ ማጽእክ ህሌኩ። ግድለ ሰለሕ እንበት ህለ፡ ረአይክ ሀበኒ።” “አነ ረአይ እግል ሀበከ።” “አቤ እንተ።” “በገ... ምነ ምዕል ለእንተ ትትበገሳተ 12 ምዕል ዐልብ። እተ 12ይተለ ምዕል አነ ከሰለ ህሌኮ በልሰ እድሪስ። እብሊ ከፊነ እንዴ ትባህለው፡ ገሰር እግል እድሪስ “እግል ለአከውኒ፡ እድሪስ ምስልኩም እንዴ ትዋጅህ ኖሱ እብ አፋሁ፡ ሚዳን ፍገሮ አው ኢትፍገሮ እግል ሊበለኩም መጽእኩም ህለ እግል ኢበሎም ቱ” እንዴ ቤለዩ አሰክ ለልዓርፍ እተ አካን ጌሰ።

ገሰር ምስል ኤረትርዩን ደረሰ ጃምዐት ዕላቀት ትርድት ሰበት ዐለት እግሉ፡ ሐብ’ልወጠን ምነ አሰሰው ህይ ምርት ሰበት ዐለ፡ ረሰሚ እግል ልርከዩም ላዝም ዐለ። ጉምዓም ሰበት ጸንሐው ላኪን ደሰ ኢቤለዩ። እብ ለገብኦት እግል ልትጋመዮም ሓሰብ ዲብ እንቱ ኖሶም በድረው።

እተ ሰክብ ዲቡ ለዐለ ሆቴል ክልኦት ምናም መጽእው። ምርቶም እድሪስ ገላይዶሴ ለካልኦይ ህይ መሐመድ ሳልሕ ሁመድ። እሉም ክልኦት ምነ እሙራም ወሰሙያም ደረሰ ጃምዐት ዐለው። ምስል ገሰር ለወደወ ሀጃክ ኖሶም ቱ ለአትብገሰው። እተ መዋጅሁቶም እት ረአሰለ ሰለሰ ዙዐመ ምን ሕድ ለሰቱሩ ጋራት ክም ህለ እሉም ቱ ለሸርሐው እሉ። አሰክ ከሰለ ክም አቅበለ ምስሉም ልቀኦ ትሉሉይ እግል ለህሌ እሉ፡ እግል ኩሉ ለጀሬ ተጠውራት ንዓል እንዴ ታብዐ ጀላብ እግል ልራሰሎም፡ ለገብኦ ነፈር እግል ለኦምሩ ለአለቡ ሰቱር ዕልብ ቡሰጠት እንዴ ሀበዉ ትሳርሐው ምኑ። ገሰር እግል በህሉም ኢትቃወመዩ ወይአየደዩ፡ ለሀበዉ ቱ ዕንዋን ሌጠ እንዴ ነስኦ ምናም ሳርሐዮም።



አርሄት ወአዳሌት

አርሄት ወአዳሌት ለክልሉ መሳሪያ፡ እሊ አያም እሊ እዲን እብ ግዲደ ህዱድ ለሀላ ሻይረስ ኮሮን ለከሰስ ሐብራታት ወተሕዚራት ዲብ ዐድ ወዲብ ከደን ሰምዐ ህለዩ። እሊ ለከሰሱ ምን መድረሰት ሐቆ ትፈደሰዩ ልትሃጀከ ዐለዩ።

እሊ ኮሮን ሻይረስ ልትበህል ለሀላ፡ ዐለም እብ ተማመ እት ወቅት ሐጨር ሐንቱ ርዕብ አተዩ።

ሸሩ ልክለኣን እት ኢኮን፡ እሊ ሕማም ከለም ቲ። አሳሱ ኢልትአመር ወሰራዩ።

አክባር ዶል እንፈቱሕ፡ እለን ክለን ድወል እቡ እት ለሀድግ ትርእዮን። መይት ለሀላ አዳመንመ ረቢ ኢለአርኤናቱ ለለአብል ቲ።

እለን ክለን ጥወራት ድወል ደወ ኢረክበዩ እግሉ በሀለት ቲ?

ሀቲ አሳሱ ምን አያቲ፡ ወእብ ከአፎ ጽብጠኩ እብ ሚ ትትሳሬ ምኑ አስክ እለ እመር የሀለ። ላመ ዲቡ ትረኣ ወቅት ሐጨር ቲ። ወክምሰል ሸበክት ኢንተርኔት ክለ ዐለም እት ሐቲ ዶል ትገልበበዩ።

ዐጃይብ ቲ፡ እለን ለጥወራት ልትበህላ ድወል ምን ክሉ ዲበን አኩ።

አቤ፡ አመት አለበ ለመጸክ አባይ ዱሉይ ሰበት ኢትጸንሐ። እግል ልትዐወት እትከ ቀድር።

እለን ድወል እለንመ እብ ጠወረዩ ኢኮን፡ ቀደም እለ ለኢትረኣ ሻይረስ ሰበት ቲ። መዳሊት ዋድያት ኢጸንሐዩ። ሰራይ እግል ተአዳሌ ህዩ ለሰብብ እግል ተአምር ብከ። ሰብብ እግል ተአምርመ ወቅት ነሲእ።

ከአስክ እለ ሰራዩ ህዩ እሊ ለዋልዲን ልብሉናቱ ለህለው ወዲብ ተለሺኸን እንሰምዐ ለሀሌን ነዳፊት ሌጣቱ ለሀላ በሊኒ።

አቤ ለዐበ ሰራዩ ነዳፊት ምንማተ፡ ምን ተነፍሰ አድሕድ ወምን ተናካፍ ሓጃት ክሶሕ መትደጋግ መ ላዝም እግል ልግበእ ለወጅቡቲ።

እሊ ማሰክ ለልትበህል እት አንፎታትን እንወድዩ ለሀሌን ዕማም፡ ምን ሕማም ዳፊዕ በሀለት ቲ?

100% ዳፊዕ ምንመ ይእንብል፡ ገሌ ደረጃት ዳፊዕ እግልን። መሰለን እሊ ሻይረስ እሊ ለበዝሐ እብ ትንፋሱ ልትሐላለፍ ልትበህል ሀለ። ትንፋሱ ህዩ ምን ቅሩብከ ለሀላ ነፈር ሕመም እግል ልምጸክ ቀድር። በደል ክሉ ለሻይረስ ትክ እንዴ ቤለ ዲብከ ለአቲ፡ ለማሰክ እግል ልክርዑ ቀድር በሀለት ቲ እት ልብል አፍሀሚኒ አቡዩ።

አቤ አናመ እምዩ እግል ክለን ዕማማት ብዞሕ እንዴ

ትዛቤት መጽተነ። ወለ ዲብ ፈሰል ኢተአፍጊሩ ቴለተኒ። ውላድ ፈሰልን ላኪን ለበዝሐው ምኖም ዲብ ፈሰል ክምሰል መጸው፡ ትንፋሱን ሓጨረ ዲብን እንዴ ቤለው አትፋገረዉ ከዲብ ቦርሳቶም አትአተዉ። አነ ላኪን ፊን ዋልዴንዬ ሰምዐኮ ከአምዕል ምልእት ዋድዩቱ ውዕለት ዐልኮ ወአዜመ እሊቲ።

እንቲ ሰኒ ወዴከ፡ ውላድ ፈሰልኪ ላኪን እኩይ ወደው። ሕነ አስክ እለ እሊ ሕማም ለትረኣ ዲቡ ነፈር ምንመ ኢለሀሌ፡ ‘ወድ አቡክ ረኣሱ ሐቆ ላጸ እንተ ረኣሰክ አጥልል’ ለትብል መሰል ሀሌት። ለበዝሐዩ ገወውርን ዲበን ትረኣ ዶል ልትበህል፡ ዲብን እግል ኢልምጸእ እብ ዋጅብ እግል ንትደገግ ወጅብን።

አጃኒት ሰሮም ገሌ ህዩ እደዮም እንዴ ኢለሐጽቦ ጠዓሞቶም በልዎ ዐለው። እሉም መ ለሐጥ በሀለት ቲ?

አቤ፡ እደዮም እንዴ ኢለሐጽቦ ለበልዎ ኮሮን ሻይረስ ሌጠ ኢኮን ለጽብጦም፡ ለገብእ ብዕድ ሻይረሳት ወጀራሲም ክሉ እግል ለሓምሞም ቀድር። አምዕል ምልእት ምሰል ከራሱ፡ ቀለም፡ መሳሐት፡ አጨብል ኩረት፡ ወለመሰሉ ምሰሉ ውዕላም እንዴ ዐልነ ነብረ ዶል እንጽብጥ፡ እሊ ምን ክሉ ለአክ ከለጥ ቲ። ለሕማም ኖሰነ ገቢይ ነአጠፊሕ



እግሉ ሀሊን በሀለት ቲ።

ወሀተ ትገቢእ ወእለ ትመሰል እንቲዲ፡ መደጋግነ ነአዚድ።

አናዲ ምነ ማይለ ሲቶዬ ሐጽብ በዲርዬ። አዜ ህዩ ቤት ዶል እመጸእ እምዩ ዶልተ ከእብ ሳቡን እንዴ ወዴት እለን እዴታቹ አስክ ለሐቀ ተአትሐጽበኒ።

አይወ፡ ለሕማም እንዴ ኢመጸነ፡ ሕነ ቀደመ ክሉ መናግእት ለእቡ እግል ልእቲ ለቀድር ምን እንዳቢእ ምኑ ለሐይሱ። እለ ገቢይ ለትትሐበረነ ህሌት እበ እግል ኒጊስ ለአስትሀለነ። አማንዬ ቲ ማሚ አዳሌት ሕቹ።

ሰኒ አማንኪቲ። በደል ሓዚ ሰራይ ምን ቀደምክ መትነጃይ ተ ለመሰል ማሚ?

ከላሰ ገድም አሸቃል ቤትን እግል ንሸቄ ወዋልዲን እግል ንሰዴ፡ ደሐን ወዐሊ አርሄት ሕቹ።

መዓልኬር ወዐሊ አዳሌት ሕቹ፡ ዮም ክም በዲርን እደይ ሕድ እግል ንትጸበጥ ኢኮን። አስክ እደይን ነሐጽብ ምን ረዩም ሌጠ መዐሰላመ ጋብእ ሀለ ለመሰር።

እብላህን አርሄት ወአዳሌት ሕድ ዲብ መክረ ወዲብ ልትሳሐቀ ሐቲ ከአስክ ቤተ ጌሰት።

ክልኩም ደረሰ ህዩ እሊ ልብላሁ ለጸንሐዩ መትደጋግ ዲብ ዐመል አውዑሉ።

ሐካኪቶ አውኪር

ቆሬዕ ውብዕራይ

ሐቲ መደት ብዕራይ ማይ እንዴ ሰተ ዲብ ጽላል ናይለ እት ጠረፍለ ማይ ለዐለት ዕጨት ጋምለት አክረረ። ዲብ ባካት ናይለ ማይ ብዕዳም ነኣይሸ ሐዋናት ከደን ወሐሸራት ምንመ ዐለው፡ ሰልፍ ክሉ እግል ብዕራይ ለረአው ላተ ውላድ ቀሬዕ ቶም ለዐለው። እሊ ሐዋን ዐቢ ክምሰል ረአው ህዩ ሀንደገት

ልቦም ዲብ ወሪዶም በጽሐት። ዲብ ለሀናፍኦ ዲበ ለዐቤት ቆሬዕ እንዴ መጽአው፡ ዲብ ሎህ አካን ሐዋን አክል ደብር ለገቢእ እክሩር ሀለ ቤለው።

ለቆርዕ ለዐባይ ሐዋን ምነ ለዐቤ ርኤነ ብሂሉም ሰኒ አትዐጀበዩ። ክእነ ዲብ ትብል ህዩ ትሰአለቶም።


ምንዬ ለዐቤ ቴለቶም። አቤ

ሰኒ ዐቢቲ ቤለው። ኩብደ እንዴ ነፍሐት፡ አዜ ህዩ አክልዬ ገቢእ ትሰአለቶም። ላላእ ምንኪ ለዐቤ፡ ሰኒ ዐቢቲ በልሰው ዲበ።

አዜመ ምነ ለዐለተ ወለዐል እንዴ ትነፍሐት፡ አዜ ህዩ አክልዬ ገቢእ እት ትብል እብ ድግማን ትሰአለቶም።

ክሉ ረኣሱ! እሊ ሐዋን እሊ ቀደም እለ አክሉ ርኤያም ይሕነ። ዐቢ. . . ዐቢ. . . ዐቢ ቲ ቤለው። ምነ ለለዐቤ ሐዋን ሀለዮቱ ለኢትወሐጠ እግል ቆሬዕ ዐባይ፡ ክሉ ትንፋሱ እንዴ ሓየበት አክለ ሐዋን እግል ትግበእ እንዴ ትቤ ዶል ትነፍሐት፡ ጠዕ እንዴ ትቤ ነቅዐት ከሞተት ልትበህል።

ምን እለ ለእንፍህሙ ሀለ ምን ገቢእ፡ አክል ርሕነ ዲብ ኢኮን አክል ጸርን እግል ንግበእ ክምሰል ይእንቀድር እንዴ ፈሀምነ፡ ርሕነ ሌጠ እግል ንምሰል ለአስትሀለነ።



አጥዐሚቶ

አምዕል ሐቲ መደርስ እት ፈሰሉ እንዴ አተ፡ እገለ ደረሰ ሰኒ ሐቆለ አቅመተ እግል ለሐምቀ ደረሳይ እንዴ ሀረስ ክእነ እት ልብል ትሰአለዩ።


መደርስ - ሰመዕ ከማል፡ 12 ቸኮላይት ዐለዩ እግልኩ። ምን እለን 5 እግል ሰሚር፡ 3 እግል ሳብር ወ2 ህዩ ጀማል ሐቆ ሀብካህን ለፍገሪትክ ሚቲ።

ከማል - ለእረክበ ፍገሪት፡ አይዋ ለእረክበ ፍገሪት ሐቆ ገብአት ሰለሰ መልህያም፡ በሀለት ሰለሰ መሳኒት ለሀሉዩ እግልዬ! ሰበቡ ህዩ ሰልሲቶም ቸኮላተ ሰበት ፈቲ፡ ግረ እለ ዲብ ፈሰል ከራሪሶም ኢለሐብዎ ምንዬ።

ማርስ ዲብ ተእሪክ ንዳል ኤረትርዩ

ገቢል ኤረትርዩ እት ክል ወሬሕ ተእሪክ ወዐጃይብ ሰጃል ቲ። እት ክል አምዕልመ ተእሪክ ጋቢእ ክምሰልቲ ለልአትክሕድ ኢኮን። ለበዝሐ ተእሪ ወጠንኩም ዲብ ተእሪክ አው መሕበራይ ዕልም ለትደሩሱ ቲ። ዮመቲ ላኪን እት ለትፈናተ ሰኖታት ላኪን እት ዎሮት ሸሀር እግል ንርኤቲ። ዎሮት ምነ ዐባዩ ተእሪክ ለትሰጀለ ዲቦም አውርሐት ወሬሕ ሰለሰ ቲ። እትሊ ወሬሕ እሊ እለን ለተልዩ ዐባዩ ዐመልያት ጋብአት ተን።

- እት ወሬሕ ሰለሰ ሰነት 1977 ተሕሪር መዲነት ነቅፈ
- ዲብ ወሬሕ ሰለሰ ናይ ሰነት 1984 መትደውሻሽ ውቃው እዝ እት ቅብለት ሳሕል
- እት ወሬሕ ሰለሰ ሰነት 1988 ተሕሪር መዲነ አፍዐበት ወመትደውሻሽ ናደው እዝ
- እት ወሬሕ ሰለሰ ሰነት 1999 መትደማር ዲሸ ወያኔ ዲብ እግሪ መኸል



ገዲም አሳር ኤረትርፍ

3^ይ ክፈል

አዱሊስ፡

ገዲመት ሚኒት አዱሊስ እት ከሊጅ ዙሉ ግንጋራብ በሐር ቀየሕ 55 ኪሎ መትር ግብለታይ ምውዳቅ ጸሓይ ምን እለ ናይ ዮም ዘመናይት ሚኒት በጼዕ ለትትረኩብ ሰኒ ሕፋን ሓለት ጀው እብ ፍንቱይ ምን ወሬሕ ጁን - አጎስት እስክ 55 ዲግሪ ሰንት ግሬድ ባጽሕ ልትርኤ። ሚኒት አዱሊስ ሐቲ ምነ ህለዩ ለልትበህለ ለገደመዩ ሚናት እት አፍሪቀ ምንመ እምብል አትራዛቅ ኢኮን። እግልሚ እትሊ ቡኮት ሰክነት ለአሰብደ እቲ እት 6ይ ክፈል ዘመን ቀደም ተውሊደት ነቢ ዒሰ ወእሰላም ጉብእ እት ህሉ፡ እት ቅብላቲ እግል ረዩም አዝቡን ምስል ጀህት ካርጅ በህለት መስር ወሮማን ምስል ግብለት ዐረብ ምን እሊ እንዴ ሐልፈውመ ምስል ረዩም ምፍጋር ጸሓይ፡ እብ ትጃረት ወሰያስት፡ ቴክኖሎጂካይ ተበድል ትሸጥ ወሻርክ ክምዐለት ልትህደግ።

ሐፊር ወድራሳት እብ ውላድ ካርጅ ጉብእ ክምስል ዐለ ህዩ



ልትአመር። አዱሊስ ምን ትደመር ወትትረሰዕ አምኣት አዝቡን ምንመ ሐልፈ ሸህረተ ወዶረ ክም ሚኒት እግል ሐድ ምሮ ዘበን ለጉብእቲ። እብ ፍንቱይ እት 3ይ፡ 4ይ ወ7ይ ዘመን ሐቆ ተውሊደት ነቢዩለህ ዒሰ ለዐለ አውካድ ምን ቅያስ ወለዐል ከድም ክም ዐለት ልትህደግ።

ጀዛይር ደህላክ

ጀዛይርን ለልሰሕብ ጠቢዕያይ አብካት፡ ዕንባባ በሐር፡ ሉቶቀ በዋቢር፡ ለትፈናተ ጅንሰ ዓሰ፡ እግል ቲቱቅ ጣፊሕ ለጉብእ ለኢክሰሐት በሐር፡ ሕፍን ሓለት ጀው እብ ዓመት ቤጽሐት አው ሰወሕ ለጠሉቡ ለትመልክ ሐድ 360 ጀዛይር ህለ

እተ። ደህላክ ከቢር ወኖረ ምነ ለዐባዩ ጀዛይር ደህላክ ተን። እትለን ክልኤ ጀዘረት ለልትረኩብ ተረርፍ አሳር ቲ። እትለን ጀዛይር ለህለ ገዲም አሳር ምስል እትየት ዲን እሰላም ለልትጸበጥ ክቲብ ዐረቢ (ኩፊክ) እት ረአሰ ገዲም መቃብር ሙእምኒን እሰላም ምስሉ ረዩም እንዴ ኢትገይሰ ብዝሐ ከዛናት ማይ ልትረኩቡ። ናይ በዲር አበው ደህላክ ከቢር ሕዲነ ማይ እግል አርሀዮት፡ ብለቅ እንዴ ጸርበው ለትፈናተ ከዛናት እንዴ ሸቀው ለቀጥረት ቅጥረት ዲብ ለዐቅሮ ምን ጽምእ ለአባሩ ክምስል ዐለው ልትህደግ።

ስልማን ወድ መስመር ምን ዐድ ትማርያም አምበለ እግል መራነት ለሐለዩ ሐይለት። እብ ድመልመ ብዙሕ ሓሊቲ። ከእለ ሃሁ ምን ዘመተት ለቤለ ሕላየት እግል ንርኤ።

እሊ ሕጻጽ ወዐራዶ - በዲር በዴ እብ ክል ቤት ምድር ራየት ወሐጲት - ብሮካታት ወክድ ቤት ምን ሰቡክ እት ሕጻጽ - ዕዳይ ክቡድ ወፊዴት ወለ ደሀረ ምን ወቅልቲ - ወክለ ስሙ ለትክሬት ሐይት ብእተ ኩብጂ - ኢደለወ ወኢደሌት ኢትመይት ወኢተሐይ - ኩብድ ሐቆ ኢንጌት አደብ ሳልሰ በቃራቲ - ኢመጸአክ እብ ትምኔት እንራብ ሳሚዕ ህሌት - ማሌ ምሴት እብ ሕሚት ሻምመ ልምጸእ እብ ፊት - ቀልብመ ልምጸእ እብ ሰኔት፤

ትንፋዩ ወዐገበ - ዳግሬ ወመሓዝ ሺሸሩ እት ኩብደ ወዴቲ - ግርግር ማይ ወሰዐሩ ነዳልለ ህሌነ - እንዴ ገኣት ገለሉ ፈንጎሕ ለሕጻጽ ሳምያተን - ክል ቤት ልፍገር አክሩ ሳሕል ወድ ባጅል ከልአዩ - ሰዋክንያይ እበ ገመሉ አቡክ ሐየት ተብዐት ቲ - ገጹ ዝውይ ወአሰሩ ሉብክ ናሽሕ ከልአዩ - ከበዝሐ ዲብነ መረሩ፤

ዓመት ኢኪትቲ አቡክ - ሕራድ ኢኮን ወተረብ አውለት አውልቲ አቡክ - ሮረት ባልሰት አመቅረብ ብክር ሐጋይቲ አቡክ - መሰረጥ ጋብኣት እብ መሕሉብ ለምን ሰብ ትገይ ኢነአቤ - ወምን መቅጠንን ትትገረቡ፤

ደብር ደንደን

ወነቅፈ

3^ይ ክፈል

ደንደን ምነ እግል መደት ዐስር ሰነት እብ አውለውየት ልትሰሚ ለዐለ አርት ምን ሰዋትር ምሔርበት ቲ። እብ ሰሜቲ ህዩ ኢኮን ኤረትሪ ውላድ ካርጅመ ሰኒ ለአሙሩ። ደብር ደንደን፡ ዲብ ርሽመቲ እንዴ ገኣክ ረዩም አካናት እግል ተአቅምት ለለአቀድር ናይ 1969 ንቅጠት መወቀል ለቡ ምህም ወእስራተጂያይ ደፈዕ ቲ። ወግሬ ወተሰሰ ህዩ ምነ አግደ ለበቅል እቲ ጅንሰ ዕጩይ ቲ። ሰሜት ናይ እሊ ውቁል ደብር እብ ሙናድሊን ወእብ ሰነክ ደዋይሕ ሐቲ ቲ። ደንደን ልትበህል። ዲቡ ዐባዩ አክዑን ወአብዓት ክምስልሁመ ረአሰ ሕድ ለትከወነ እመን ለትመለኣ ቲ። እሊ ርዝቅ እሊ ምስል ሰሜቲ ዱቅሪ ልትጸበጥ ክምቲ ልትህደግ። ሰበቡ እብ ህግዩ ትግሬ “ደንደን” በህለት ቃሎት ለትበልሰ ክርን ቲ። ደንደን በዲር ዲብ ምድር ሸፍ እንዴ ኢልትበደል’መ እብ ቀሎ-ቀሎ ለኢልደበል ደብር እብ ሱሰቲ ክምስል ዐለ ልትአመር። ሰበቡ ለደንደን ትብል ቃሎቲ

ሳሕል ወሰዋትር ስሙድ

ህዩ ዝያደት ክምስል ልትፈረህ ትወድዩ ዐለት። ክምስለ ሐሬ ዲብ ወክድለ ሐርብ ወግራሁ እመኑ ለትፋለመ፡ ትርቡቲ ለትደራሽሽት፡ ወዕጩዩ ለነደ ወትከፍከፊ እንዴ ኢጉብእ ዲብ ቅዱም አዝመን ደንደን ለፈናተ ሔዋናት ከደን እቡ ስርጉይ ወእብ ጋምል ዕጩይ ግልቡብ ዐለ።

ደብር ደንደን ክምስል ድፈዕ ዳይም ምን ልትሐሬ ወሐር ጄሽ ሸዕቢ እት ርሽመቲ ሳብት ወዳይም ሰዋትር እንዴ በክ፡ እብ አባይ ክምስል ኢልትከዩድ ጉብኢ። ክሉ ልትከፍከፍ እቲ ለዐለ ጅሌል ወቀናብል እንዴ ከህለ ህዩ ዲብ መባጥሩ እግል መደት ዐስር ሰነት ሐጠጠ ወሰብተ። እግል ዲመ እሻረት ወቃአምርተ ስሙድ

ወኤማን እሻረት እስትሻህድ ወነስር እንዴ ጉብእ ህዩ እብ ፋሽ ወሐበን ሸንን ህለ። ደብር ደንደን ዶር ትርኤ እብ ፍርስነት፡ ኤማን፡ ስሙድ፡ ሐበን ወሐጠር ትሸሮ፡ ኣቤ! ደንደን ደብር ኤማን ወደብር ስሙድ.....!

እለ ማሌ 43^ይ ሰነት ተሕሪረ እብ ነያረት ለዐየደት መዲነት ስሙድ ወእም ስሙድ ላተ ነቅፈ እሊ ደብር እሊ ክምስል ሕጌ ወገለብ ምን ኢጉብእ እለ ህታመ ክመ ብዕዳት ሐዋተ ካልኣይ ዶል እብ አባይ ወትጸበጠት ዐለት። ላኪን እብ ፈድለ ሳምድ ወሳብት ሰዋትር ነቅፈ ምንመ ደመረት ወምን ምድር ወሰመ እብ አሰለሐት አባይ ምንመ ትረጅመት እብ አባይ ካልኣይ ላተ ኢትከዩድት።



መርሐባቡ ደንደን

ደንደን ሕብር አራብቲ - ወሕብር ሰገን ደንደን ደብር ነስርቲ - እብ ሰሜቲ ንትሐበን ሹህዳ እክ ትጋወረት - እበ ሻምከ ወደንደን መርሐባቡ ደንደን - ደንደን ቅብላት ጠባይት ሓዩት ወአወንን - ረአሱ ትካይድ ወህቲ ገላብዖም - ክም ዋልዳይት

መርሐባቡ ደንደን - ቅብላት ኢተዑብር ሓዩት ወአወንን - እት ረአሱ ነብር ደሀብ ወአልበስኩም - ምን እቀድር ደንደን ሕልፍ - ትከራ ምና ከይነት እብ ዕጩት ተበረዐ - ወእብ አበነት ወራራት አፍሽለ - ሰነት- ሰነት

እብ ሰላሙ ኢጌሰ - ጄሽ ለደንደን ትሸፈተ ጣኢራቶም ካሬና - ካልሻ እበ ድምረተ ዐረባቶም አንደድና - ወትምሻምዔል ትሸተተ ዔለ ኤማን ብዲበ - ነቅፋ ዲበ ቀበተ ኢለሐረግርግ ወኢሰኬ - ምና ማያ ለሰተ ኢለሐርግርግ ወኢሰኬ - ምና ማያ ለሰተ።

አድም መሐመድ አልሓጅ

ሸባብ



ለብዙሃኑ ወቅት ምስገዮት ሐቀ ወዲነ አውመ መሰረ/መስገዮት ሐቀ ረኩብን ሐያትኑ ራትዐት ወናይ ርይሐት እግል ትግበእ ሰአየት ወደማነት እንወዴ። እግልሚ፣ ናይ ልብነ ወምራድነ ሐቀ ረኩብን ለሻም ኖሱ ልጠወር ሰበት እንብልቱ። ምናተ፣ ሙብዝሐ ወቅት ሐያት ክመ ሕነ ነሐዝዩ ለኢትጉብእ እቲ ወቅት ሀሌ። እግል መሰል፣ ፈርሐት እት ንጸበር አካይ መቅሬሕ፣ ዐውቲ እት ንጸበር ፈሸል ዶል ሳድፊኑ ወእብ ድዱ እግል እሊ፣ ብዕዳም ክም ምራዶም ሰኔት ምስገዮት ራክባም ዶል እንረኤ፣ ምስጢር ናይ ምስገዮት ዕውትት ሚ ቱ እግል ኒበል ላዝምቱ።

ራቴዕ አግቡይ ብገዮት ምስገዮት ለለሐብሮ አክትበት ምንመ ይህለው ንአግቡይ ብገዮት ፈርሐት ለትመለኣት እተ ምስገዮት ምነ እት ሐያትነ ለሳድፊነ ናይ ክል ምዕል መናበረትነ ተሐድያት/መሻል ወተጃራብ ቱ ለእንረክብ። ምስል ዕምር ወወቅት ህዩ ምስጢሩ በርህ እነ። ምስጢር ዕውት ዕላቃት ምስገዮት ሐቀ ምን ተጃራብ ገበኣ፣ እብ ሰብር ወቀልብ ፋዩሕ ንዩት መሰኒን እግል ንፍህም ንጀርብ ወንዩትን እግል ነሐሰኡ ወጅብ።

ከእግል ዮም እለን ምስገዮት ሰርግልት እግል ንብኔ ለሰድዖን ንቃጥ ንርኤ።

1. ሕዲነ መሳኒት ወምስገዮት ለልትበህል አለቡ

እተለ እለ ህሌክ አካን ልግበእ መወቅት ሀሌ። እግል ተአሰተብድዩ ለትቀድር ምስገዮታት መከለሲ አለቡ። ሰበቡ፣ ክመ ሕነ ለነሐሰቡ እንዴ ኢጉብእ፣ ምስገዮት አንዋዑ ብዘሕ ቱ። ብዝሓም ምስልን እግል ልትመሳከው ሐቀ ኢቀድረው፣ ሕነ እኩይ ህሌነ በህለት ኢኮን። እነ ለመሰሎ ወለ ፈቱ፣ አላፍ ምኖም ለበዝሐ ህለው። ብዝሓም አንፋር ንዩቶም እንዴ ኢለአምሮ ምስለ ረክበዉ ነፈር ምስገዮት አው ሻም ለጸብጦም ህለው፣ እብ ክም እሊ ለአንቡት ምስገዮት አክረቱ እግል ትሰኔ ለህለ በክት ሐድ ቱ። ሰበት እሊ ምስገዮት ራትዐት

ሕዱግ ሰሌማን

እግል ንብኔ፣ በይን ኢንሕሬ ወምነ እት ምስገዮት ለሳድፍ መሻክል ኢንፍረህ።

2. ምን ሕነ ወናይ አማን ንዩትን እግል ነአምር ወጅብ

ብዝሓም አንፋር ምስገዮት ለአነብቶ እት ህለው ጠምጠም ወለዘት ሐያት እግል ለአዳውሮ እንዴ ቤለው ቱ ለልትበገሱ። ክም ረሕመት፣ ፈታ፣ እሕትራም፣ ሸረፍ፣ ሰዳይት ወብዕድ እግል ልርከቦ እት ሻም ለለአቱመ ህለው። ደአም፣ እት ሐያት ምለዐል ክሉ ለምህም፣ ነፍሰክ ወንዩትክ አመሮት፣ ሸረፍክ ወመባጽሕክ አከዶት ወእብ ፍንቱይ ነፍሰክ ለረዩሕ ወለአትሐዜ ሓጃት አመሮት ቱ። እግልሚ? ምን ልትበህል፣ ኖሱ ለኢትረዩሐ እግል ብዕድ ፈርሐት እግል ለሁብ ኢቀድር፣ ነፍሱ ለኢለአትርም ብዕድ እግል ለአትሕተርም ኢቀድር ወነፍሱ ለኢፈቱ ብዕድ እግል ልፍቱ ሰበት ኢቀድር። እለ ሐቀ ኢትጉብእ፣ መትሻቀዩ መሰኒክ ትጉብእ ወህቱ ለቤሌኮተ እት ወዴ ነበር ኢተርፈከ።

ምስገዮት፣ እት ፍንጌ ክልኦት ሕድ ለፈቱ መሳኒት ለትተአሰስ እት ጉብእ፣ እግል ክሉም አክል ሕድ ተአትሐዝዮም ወተክሰሶም። ክልከ ህዩ እብ ሕድ እግል ትትሐሰር ወጅብ፣ ለምስገዮት ናይ ዎሮ ነፈር በኩ ሰበት ኢኮን።

3. ራትዐት መፋህመት ወግግት እግል ለህሌ እግልን ወጅብ

ክል ዶል እግለ ሐዝውነ ወትበህለተነ ሰኔ እግል ኒበል ኢወጅብ። ለኢትጉብእ ወለኢእንፈትዩ አውመ ለኢነሐዝዩ ሓጀት ሐቀ ገበኣት፣ ለእ! ኢኮን! ኢትጉብእ! እግል ኒበል ዋጅብናቱ። እምበል ንዩትን ብዕዳም እግል ንረዩሕ ለእንወድዩ ሓጃት እግልን ኢረዩሕ ወህቶም ሰበት ለአምሮ እብክ፣ ለአቡነ ድኢኮን ፈቱነ ኢልምሰል እትነ። ምን አጅል ሻም ወምስገዮት ለኢትጉብእ ሓጀት እት ትርኤ ትም እግል ቲበል አለብከ። እብ ቀልብ ፋዩሕ ህዩ ረኢይክ ሸረሕ፣ ለለአትሐዜክ ትሰኣል

ወመሰኒክ ሚ ክም ለሐዜ ፈሀም። እተ ክምሰልሁመ እት ኢወቅተ ወአካነ ለትፈግር አማን ዴረዶት ክምተ አምር።

4. አዳም እግል ትቀደር ኢትጀርብ

መሰኒክ ልግበእ መበዐል ሻምከ፣ ክም ምራዱ እግል ልንበር፣ ናዩ ወቅት ወሐያት እግል ተህሌ እግሉ በክት ሀቡ። ለኢትፈሀመነ ሓጃት ሐቀ ህሌት እብ ገበይ ንትሰኣል፣ ወክለጥ ሐቀ ረኤናመ እብ በሰር ረኤይነ ነሀብ። ለትሰረረተ፣ መሰኒን እግል ንቀደር ኢንጀርብ። ሰበቡ ሀዩ፣ ምራዱ እግል ልውዴ ምን ሐቁ ሰበት ገበኣ። ብዝሓም አንፋር፣ ዎሮ ኣደሚ ዝደድለ ወጅቡ ተሐሰርክ እብ፣ ትአየሰክ ወክሉ ለለሐዝዩ ወዴክ ወአትመምክ እሉ ምንጉብእ እግል ትቀደሩ ትቀድር ልብሎ። እሊ ላኪን አክረት አለቡ። ለመሰኒ፣ እግል ዶሉ ምን አጅልክ እንዴ ቤለ ምስልክ ምንመ ገይሰ፣ ፈጅር አሰክ ንዩቱ ወመባጽሐ ክም ለሄርር እግል ነአምር ወጅብ። ሰበት እሊ እግልን ለመሰል ወምስልን ለልትፋህም ንሕዜ እንድኢኮን፣ አዳም ክምለ ሕነ ነሐዝዩ እግል ኒደዩ አው ንቀደሩ ምን አወልነ ኢንትበገሱ።

5. ፍንጌ ምስገዮት አማን ወናይ ሐሰት ለህለ ፈረግ እብ ራቴዕ ንፍህም

ምስገዮት ወሻም ሐሰት ዕምር አለቦም። እት ሐቱ ወቅት ክሉ

ጠባዬዕ ናይ ሐሰት አክባር

ሐቱ ጀሀት ለጠበዐ ሐብሬ ወፍክር፣ መትክበባት ወወዘዎት፣ ምን በዲር ለጸንሐ ጠባዬዕ አዳም ቱ። እትሊ፣ ደለ ጥባይል ለጸብጠ ነፈር ሰሕሬ ጋብእ እቱ ለለህለ ወክድ ሀዩ፣ ሐቱ ጀሀት ለተበዐ ሐብሬ ወፍክር፣ እብለ ሸፍንት ወዘዎት ልሙድ ጉብእ ሀሊ። ዎሮ ምን ጠባዬዕ ናይ አክባር ቀሽ/ሐሰት ሀዩ፣ ሐቱ ጀሀት ለጠበዐ ሐብሬ ወፍክር ወዘዎት ቱ። ናይ ቀሽ አክባር ላኪን ሰለኣሰ አግደ ጠባዬዕ ቡ።

ሀ. ሐቂቀቱ እግል ልተኣከድ ለኢቀድር ሐብሬ ቱ። እብለ ገበኣ ልግበኣ ብሕሰ፣ አማኑ እግል ልትኣክኣድ ኢቀድር። ደለ እንቀርኡ ሐብሬ፣ ሐቂቀቱ

እግል ነአክድ ሐቀ ኢቀደር፣ - ምን ቤለዩ? እት አዩ ክትብ አው ዒማት? ሚዶል? እት አዩ አካን? ለልብል አሰኢለት እቱ ሐቀ ኢበልሰ።”ናይ ቀሽ አክባር ጉብእ?” እንዴ እንቤ ነፍሰነ መትሰኣል ኢንትረሰዕ።

ለ. አክባር ሕሰይ/ ቀሽ ፣ እግል ወዘዎት ወጠለቀቱ፣ ለህልት፣ ለለአትናይት፣

ወለለአሸፍግ ሐብሬ እብ ግብኣቱ፣ ብዕዳም አንፋር እግል ልርኤወ ወልሰምዕወ ሐቀ ዳረኬን፣ አክባር ሐሰት እግል ልግበኣ ክም ቀድር ንትሸክክ። ነፍሰነ ንትሰኣል፣ ራተዐት ወሐቂቀት ናይለ አክባር

ምስገዮት



ምራድከ ክም ሕልም እት ቀደምከ ልትካዩል ወልትርኤከ። ሐቀ አምዴላት ላኪን እብ አማን ፋቲ ዐልኮ መኢፋሉ እት ትብል ለተርፍ እቱ አውቃትመ ሀሊ። ሰበት እሊ፣ አማን ምስል ወቅት ቱ ለትተመር። ወሻምመ እብ ተሐድያት ወመሻክል ሐያት ቱ ለልትመዘን፣ እሊ እንዴ ፈሀምነ ህዩ እብ ሰብር እት ፍንጌ ናይ አማን ወሐሰት ምስገዮት ለህለ ፈርግ እግል ንፍህም ወጅብ።

6. ሰኔ ሸክካ ነፍሰነ ወመሰኒን እግል ንርኤ ወጅብ

ክሉ ወክድ አዳም ክመ ሐነ እንወድዩ እሉ ፈዴን፣ ሰኔ ሐቀ ወዴነ ሰኔት ወእኩይ ሐቀ ወዴናሁ እኪት ፈዴን። ክልዶል ለከለጥ ኢንርኤ፣ ክል ነፍር ናዩ እኩይ

ወሰኔ ሸክካ ሰበት ቡ፣ ለሰኔት እግል ንርኤ ወነሐምድ ወለከለጥ ህዩ እብ ለግፈት እግል ነአፍህመተ ብከ። ሰአየት ወጸብሬ ሰኔት ተህሌ እግልን ወእግለ ሰኔት ንርኤ።

ከሓይሳም ሸባብ፣ ለመትሐርካይ ወእት ክለ ሐያት ገቢል ለሻርክ ክፋል ናይ መዐዩ ምን ጉብኣ። ሰለል ምስገዮት ራትዐት እንዴ አመርክ፣ እግል መጽኤነ ነፈር እብ ፈርሐት ወቀልብ ፋዩሕ መርሐበ ኒበል ወንትክበት። እግል መሰኒን ነሐሸም ወነአሕተርም። ፍገሪት ሰበር ጥዕም ሰበት ገኣት ህዩ፣ እግል ክሉ ትቅዩር ወመሻክል ሐያት እብ ሰብር ንጋብሁ ወሕሻል ምስገዮት ራተዐት ንዋሌ።

ወድ አዳም፣ ለትሐባለክ ሐብሬ እት መትክባት ወበለሰ ህዩብ ሕድ እግል ልምሰል ምንመ ኢቀድር፣ እግልሚ ቱ ጉብእ እትሊ ወቅት እሊ፣ አረይ አክባር ሕሰይ እንጉብእ ለህሌነ? እት ለልብል ሰኣል፣ ሰር ምነ ክሉም ምኤምረት ለልትፈሃም እተን ንቃጥ እለን ተን።

- እት ሕኩማት ወመንዘማት እዕላም ለዐለት አማነት ሸዑብ ዲብ ትነቅሰ እብ ጊሰተ።

- መንዘማት እዕላም፣ መሐርሪን፣ ሴድዩት ወሰብ አርትተዎት ለልጅህዶ እቱ መጃል፣ እብ ጋብሆት፣ ለገኣ ነፈር፣ አክባር እግል ልሸቁ እቱ ለቀድር ወቅት እብ ብጸሐትነ።

- እኩባም ሐብሬታት ወአክባር ምስል እንዴ ትጀመዐው፣ ምን ዓይላት፣ መልህደም፣ መሻቂት ወብዕዳም፣ ምን ወአሰክ ተንክሮ እብ ሀለዮቶም።

- ሐብሬ ወአክባር እብ እንትበህ ታብዎት ሰበት ነቅሰት።

- አክባር ቀሽ፣ ስምዒት ለለሀርሰ ወለበጭብጭ እብ ግብኣቱ።

- ክምሰልሁመ፣ አክባር እብ እንተርኔት ጠለቀት እብ ብዝሐቱ።

እሉም ወለ መኣሱሎም አሰባብ፣ አረይ አክባር ቀሽ/ሕሰይ ክም እንጉብእ ዋድያምነ ህለው። ከእሊ ደረሩ እት ምጅተመዕ ወደውለት እብ አመሮት፣ ጠባይዑ እንዴ አመርክ እግል ንትሓፈዝ ምኑ ወጅብ።



ልግብ

ሚተ ለምነ ትፈርህ?

እለ ሕክ፡ ክል ዶል እግለ እት ክለ ሐያትነ ለረከብናህም ጋራት እግል ኢነአብዔ አውመ እግል ኢንሰኢኖም እት እንፈርህ እነብር። ሰኒ ሕሳብን እንወዳ እሎም ወእግል ኢልትፈርቀቀ ምኒነ ሕንክክ እንገብእ እቶም ወክሉ ረእሱ እግል ነኡተምትሞም ኢነሐዜ። እግል ኢልትረአው ምን ለገብእ ልግበእ እብ ኦየ ገበይ እግል ንሕብደም እንቀድር እት እንብል እት ሀመት እንነብር። ሐቲመ ለህሌት አለቡ፡ ወሐቲመ እግል ትግበእ ኢኮን፡ ወበዲርመ ክሉ ረእሰ ለዐለት አለቡ።

ዶል ለእለ ተሐሰባተ፡ ክሎም ለእሎም ብከ ጋራት፡ ማል እግል ልግበእ ቀድር፡ ቤት፡ ሸቅል፡ ሕጺትኪ...እሎም ክሎም ሐቲመ ኢኮን፡ ወክሎም እት ሐቲ ዶል ለትሰእኖም መሰሉ እትኩ፡ ወእሎም ጋራት እሎም ክሎም ክም ወሀም ቶም፡ ወክም ደዐለው ቶም፡ በህለት ሐቲ ዶል እት ቀበት በል-ሽም ለልትሰእኖ ጋራት ቶም።

እብሊቱ ሕነ አዜ፡ ለጋራት ደማን ሰበት አለቦም፡ ለእዲናን ምን ሐዲስ እንዴ አንበትነ እግል ነኡተላለየ ፈርሀት ትገብእ እትነ። ከእብሊቱ ሕነ ለእቲ ህሌነ ተየልል እግል ንትፈከር ወእሉ እግል ንሕሰብ ወነኡትዋይን ለእንጀራርብ።

ሐት-ሐቲ ዶል እለ መሰል ፍክር ክሉ ክም ሀለ ሰበት ንትከቡቲ፡ ሕነ ምን ሐዲስ ምን በሕ ንትበገስ ክም ህሌነ ለትሸፊሕ ፍክረት እት ረአሰነ ትደውር፡ ከለጋር አኪድ መሰል እትነ፡ ምናተ ፈርሀት ትጽብጠኩ፡ ወእለ ፈርሀት እለ እግል ንትዳገን ክሎም እለ ፈርሀት ለሰብዐ እትነ ጋራት ምን ሐንገልነ ነኡረይሞም።


እለ በህለት፡ ክሎም እግል ንርከቦም ለእንቀድር ጋራት ልግቦኦ ወእግል ንሰጅሎም ለእንቀድር ዐውቲታት እግል ንሰኢኖም ክም እንቀድር፡ እለ መሰል ተየልል እግል ልሳድፍ ህዩ ናይ ካልኢታት ወቅት ሌጠ ቱ ለከፍዩ። ለእሎም ትረክብ ጋራት ክሎም ምን በደ እግል ተኣድሕኖም ለትከፊከ ሐለት ሰበት አለብኩ፡ ክሎም እት ቀበት ካልኢታት እግል ትሕገሎም ትቀድር። ክሎም ናይከ ለመሰሉ እትከ ጋራት ናይከ ኢኮን፡ ወክሉ ረእሶም ናይከ ኢገብኡ፡ ክል ዶል ናይቲ እግል ቲበሉ ለትቀድር ጋር ሀለ ምን ገብእ፡ ህቲ ክል ዶል ምስልክ ለሀለ ቲ፡ እንተ እትለ እዲነ እት መጽኣክ እቲ ወቅት፡ እብ ብራቅካ ቲ ለመጽኣክ፡ ከእተ ተዐቀብል እቲ ወቅትመ እብ ብራቅክ እግል ተዐቅብል ቲ።

ከእለ ሐቆ ትገብእ፡ ለምነ ትፈርህ እሱዋተ ገብእ?
ከክሉ ገጹ በደ ሐቆ ገብእ፡ ልብዔ እግልክ እንተ ኢትትሻቀል እቡ። አሰክመ ዐፋይ ህሌክ ወልብክ አክል ሕድ ለሀንድግ ሀሌ፡ ወአሰክመ ሸናቡእክ ወቀነቅሸክ ተማም ሸቂ ሀሌ፡ ወደምክ እተ አሰራሩ ተማም ለአሴርር ሀሌ፡ እግል ትንበር ቲ፡ ወእግል ተኣሰተንፍሰ ቲ። ከእንተ ለረአሰክ ሐቆ ሀሌ፡ ክሎም እሎም ለእሎም እብዱይ ህሌክ ጋራት ክሎም እግል ትብለሶም ቲ!
እዲነ ህዩ ዶል ከእብ ሰምጦ ምርት ሰበት ትገብእ፡ እንተ ቀደም እለ ሐቲ ዶል ለትወድዮም ጋራት፡ ዶልክ ምን ሐዲስ እግል ቲደዮም ወእግል ትድገሞም ቲ፡ እብ ብግርክ አሰክመ ህሌክ ለእለ ከሰርክ ክለ ላዝም ቲ ምን ሓዲስ እግል ትበልሰ። ለጋራት ክለ ክመ እተ ትልህየ (ጌም) ቲ፡ ወሕነ ህዩ ላዝምቲ እግል ንተልህየ...ሐያት እዲነ ክም እላተ ለሰፈተ።

ዝበድ

ዛፆታት

ለእለ ትወዴ ግድለ ምስል ብዕዳት ኢተኣትባድረ፡ ወብዕዳም ለረከብ ዐውቲ መትናያት እግል ትክልለኣክ አለቤ፡ ናይከ ናይ ኖሰክ ሰከት ተሀሌ እግልክ ወክሉ ረአሰክ ሰእየት እግል ትብተክ ወእግል ትሰልም አለብኩ።



ተበሰም

ምርት ሸቃላይ መክተብ ቡስጠት፡ ዲብ ምርት ዐሚል ለትለኣክ ዐፍሽ እንዴ ረፍዐ፡ እበ እተ ልኡክ ለዐለ ዕንዋን እንዴ ትመርሐ እተ ቤቲ በጽሐ። ሐር አፍለ ቤት ክም በጽሐ ከልብ ሰኒ ግርጉር ትከብተዩ ወገበይ እበ ለሐልፍ ከልኦዩ። ወምን ክትርመ እት ነቤሕ ሃዩመ እቲ ልቡ ወዕንቲ ቃዊ እት እንቲ በዐለ ቤት ፈግረት እቲ።

“አብሸርከ! ሐቲመ ኢትፍረህ፡ ‘ክልብ ለብዞሕ ነቤሕ ሐቲመ ኢወዴ’ ልብሎ ዐለው ሰብ መሰል። አዜ ስም’ነ እከ እለ ከልብ ሐቲመ ኢወዴክ ነዐ ሕለፋ ከእቲ” ቲለቲ።

ህቲ ህዩ፡ “መንባይቼ፡ እለ መሰል እለ አናመ ሰኒ አምረ፡ ምናተ እለ ከልብኩም ህዩ ለአምረ መሰለኪ?” ቤለዩ።

ዓደት ነስእ ነብረ ዑፊት

ለእለ ትነሰእ ነብረ አቅምተ፡ ሶታይ ወቀጣፍ ላቲ ሐመሊት ሕፊ። ለእሉ ትነሰእ መቀዝይሰት ሶታይ ወቀጣፍ ላቲ ሐመሊት ውሱክ እቲ ክም ህሌክ ተኣከድ። እሎም ሐመሊት እሎም ታጅር ዔማት ናይ ፕሮቲን፡ ሐጺን፡ ካልሰዩም ወአልያፍ አውመ አግዳድ (fiber) ቶም። ሶታይ ወቀጣፍ ሐመሊት እግል ተኣብሸሎም ቀለላም፡ ወእተ ክምሰልሁመ አክል ሕድ ሸንሀት ነብረ ለፈትሎቶም። ወእምበል እሊመ ሐጨር ኮርስ ከሸኖት፡ ለህሌት እግልክ ቃእመትለ እሉ ተኣዳሌ ነበራት እግል ተአውሰዐ ሰዴከ። ማይ ምዶል ክም ትሰቲ

ታጅር ናይ ፕሮቲን ጽበጥ ለብእቶም ሐመሊት ቶም።

ለነብራክ ሰኒ ምጨረ። ወአት ነብራህ እት መጭር ረኢ እንተ ማሚ? ወአት ገረት እንዴ በልሰት ትመጭር እት ህሌት እግል ገረተ ምን 40 – 60 ዶል ትመጭረ። ምርት ምነ ሰኒ ቀለል ወዋዴሕ ላቲ አግቡይ ለመጭት ነብረ እንዴ አሰኔክ ዶል ትመጭሩቲ። ነበራት ለሻፍግ (fast food) ወሓምል ሰተይ ምናም አወልጥ። ለነብራክ ኖሰክ እት ቤትክ አዳልዩ። ነብራክ እብ ኖሰክ እት ቤትክ ዶል ተኣዳልዩ። እለ ኖሱ ዐባይ ፋኣደት ቡ፡ በህለት ምን ለሐምቅመ ለሐሰ ወቅትክ እት ቤትክ ምስል ዕያልክ ክም ተሓልፋ ወዴ። ትብሌዕ እት ህሌክ ክሉ ለባልክ እተ እለ ትብሌዕ ህሌክ ነብረ ክረዩ። ልብክ እተ እለ ትብሌዕ ህሌክ ነብራክ ዶል ትወድዩ። እንተ አክለ ገርብክ ለጠልበ ነብረ ሌጠ እግል ትብለዕ ቲ። ከሐቆ እለ ነብረ እግል ትብለዕ እተ ትትገሴ እቲ ወቅት፡ ክም ከረ ሪምት ኮንትሮል ወተለፎን ለመሰሉ ሰነዕ ምነ ባካት እግል ዶሉ አሪሞም። ፍጡር ህዩ ብዞሕ አህትማም ሀቡ፡ ወእግል ሐቲ ዶልመ ልግበእ እግል ተሀምሉ አውመ ፍጡር እንዴ ኢትነሰእ እግል ትውዐል አለብኩ። ለነብራክ ሰኒ ሓቅቀ። ሰኒ ላቲ ዓደት ነስእ ነብረ፡ ሸክሰየትክ እግል ትከውን ሰዴከ። እብሊቱ ለቀዲማም ለቢባም ነበራት ከፊፍ እግል ልንሰኦ ለሐሩ ለዐለው። ወምን እለን ከፊፋት ላተን ነበራት ሚ ዐጃይብ ክም ወድዩ እግልክ እግል ትድረሱ ብእትኩ።

ወክል ዶል እግል ትፍቀዱ ለብእትክ ጋር፡ ለእለ ትነሰእ ነብረ ህታተ ሐር እንተ ሚ ክም ትገብእ ለተሐድድ፡ ከክል ዶል ነብራክ እብ ገበይ ለቢባት ሕረዩ ወሰኒ ምጨረ።

ተርጀመት መሰል

“ሐቆ ልርኡ እከ አቡኩ፡ ልሰዕም እከ አፋኩ።”
እዲነ ክል ዶል ምስለ ሀለ ወለቡ ተ ለትገይሱ። ወድ አደሚ ቡ ገብኦ ምን ገብእ ክሉ ፈትዩ ወክሉ ቀርቡ። ሓግል ወሕጉዝ ህዩ ቀርቡመ አለቡ፡ ከእዲነ መልሀይ ቦም ወለህለው ተ። ዮም ብጎርክ ምን ገብእ ክሉ ፈቲክ ወክሉ ቀርቡኩ። እዲነ ግራህ ሀበተክ ወዝፋፍክ እንዴ ትበደለት አከይ ተየልል ሳደፈክ ምን ገብእ ህዩ መሰንያምክ ወፈተቸካመ እት ልውሕዶ አውመ እት ልትዐደሞ መጽኢ። ከእቡቲ “ሐቆ ልርኡ እከ አቡኩ፡ ልሰዕም እከ አፋክ” ለትበህሌ።

በህል እ'መራም

ገሌ ምን መባልሰ ጀርመኒ ፊሎሱፍ - ፍሬድሪሽ ኔትሼህ

- ብዕዳም እት ክታብ ካምል ለልቡሉ ኣነ እብ ዐሰር ዘዐት ሌጠ እግል ኢብሉ እትሸነህ።
- ሻም ዕዉር ቲ፡ ምስንዮት ህዩ ዕንተ ተኣቀምጭ።
- እግል ምስንዮት ለትከልቅ ናይ ሕበር ለውቀት ተ እንዴኢኮን፡ ናይ ሕበር ተዐብ ወጅርሰት ኢኮን።
- ለሐሴ ሰላሕ ገሌ ዐዶ እግል ትዋጅህ እቡ ለትቀድር፡ ብዕድ ዐዶ ቲ።
- ጀላብ ሻም ለትገብእ ክሉ፡ ክል ዶል ሕዱድ ኬር ወሸር ለትዐዴት ተ።
- እግል ለሐሴ ለኢቀድር፡ ለአማን ኖሰ እሰወ ክምተ ኢለአምረ።
- ፈዳብያት ላተን አፍካር ክለን እት ወቅት መጋይስ ቲ ለልትወለደ።
- እት ፍንጌ እናሰ ወእሲት ለልትረኤ አከይ መፋህመት፡ ሰበቡ ኢህለዮት ሻም እንዴ ኢገብኡ፡ እህለዮት ምስንዮት ቲ።
- ወድ አደሚ ሕኔት ኣነ እት ገበይ ሰዋብ ህሌኮ ልብል፡ ኣነ ቀለጥኮ ወዐጉብኮ ምን ልብል ልትፈደል እሉ፡ ወካሰተን ህዩ እት ገበይ ሰዋብ እተ ለህሌ እቲ ወቅት።
- አምዕል ምልዮን ጁብ ቤ ለነፈር ለእሉ ከሬ እተን ልርኩብ እለን እንዴኢኮን።
- ልትሐለም ለሀለ እት ርሐ ሐሴ ምናተ ሐሳይ ህዩ እት ብዕዳም ሌጠ ቲ ለለሐሴ።
- ከረች ትቃትል እት ህሌክ ሕሳብክ ውዴ ምናም፡ ሐር ምርት ምናም እግል ኢትግበእ።
- መሲቀት ምን ኢተዐሌ፡ ህለዮት እለ እዲነ ቀልጥ ወገብኦ ዐለ።
- እንተ ገበይክ ብገክ፡ ወአናመ ገበዩ ብዩ፡ ለገበይ ለራትዐት..እለ ሐቲ ገበ. . . . ህታዲ ክሉ ረእሰ ይህሌት።
- እትለ ገብኣት ገበይ ምን አግቡይ እለ እዲነ እተ ትገይስ እቲ፡ ክርባጅለ በታከትክ ወእራደትክ ኢትሕደጉ፡ እት እዴክ ጽበጡ፡ ምን አመረ እት ቀደሚክ እንዴ በጥረየ ለከረዓክ መታክል ዶል ሰድፋክ እለን እግል ተሓምጥ እቡ።
- ጀላብል እሉ ብከ ረአይ ይእነድድ፡ እለ ህዩ ሕነ አክል ሕድ አኪደተን ሰበት አለብና ቲ፡ ምናተ፡ ጃላብ ሐቅ ምልክየት ወአርተዖት ናይለ እሉ ብከ ረአይ ላተ እግል ንንደድ ቲ።
- ብዞሕ ወእብ ልባብ እተ እንፈክር እቲ ወቅት ገጽነ ሌጠ ኢኮን ለልትበደል፡ ክሉ ገርብና ቲ ለልባብ ልትገልቡብ።
- እግል ውላድ አደሚ ክም ከረርም ሐዋናት ለልርእዮም ወእተ በክት ለረክበ እቲ ወቅት ለለሀርብ ምናም፡ እምበል ሸክ እንዴ ዐረው እቡ እበ አቅርንቶም እግል ልራጉዙ ቲ።
- አክል ሕድ እበ ከመ ናይ ዐዶክ ሰላሕ ዶል ተሓርብ እንታመ ክምሰልሁ እግል ትግበእ ቲ።
- ክልኤ ሳልስ እዴ ናይ አምዕሉ ለኢመልክ ገብር ቲ።
- ፈቃዲት ደዲፈት ሰኔት ተ፡ ለነፈር ሰንያም ላቶም ጋራት ብዞሕ ወቅት እግል ልትገፈዕ እቦም ተኣተቅድሩ።
- እግልዩ ለልኣሰፈኒ ጋር ሀለ ምን ገብእ እንተ ሰበት ሐሴክ እቲ እንዴ ኢገብኡ፡ ኣነ ሐቆ እለ ክሉ ረእሱ ሰበት ይአምነካ ቲ።
- ምን ክሉ ለትከተቡ፡ ኣኑ፡ እምበል ወድ አደሚ እብ ደሙ ለክትበዩ ሐቲመ ይእፈቲ።



ምን ውራቅ በሐሰ እግል ዐቦት ትግረይት

8^ይ ወናይ ደንጎበ ክፈል

ፈርግ ወዐቦት አክባር ከ.ገ.ኤ እትለ ናይ ሰልፍ 10 ሰነት ዕምረ በህለት ምን ሰነት 1979 - 1989 ሚ ታበሃ?

አይወ ብዙሕ ፈርግ ህሉ፡ ምን ናይ እስትንቡረት ከበር እንዴ አምበተት እትለ ሐልፈየ 10 ሰነት ምን ዕምረ ብዙሕ ዐቦት ወተቅዩር አርኤት እግል ልትበህል ቀድር።

እግል መሰል ናይ ሰልፍ አክባር ዲብለ ትትነፊዕ እቡ ለዐለት ከሊማት ልግበእ ወሚዛን ተርጀሞት ሰኒ ድህርት ዐለት፡ ምናተ ሐዳስ ሰበት ዐለት ህዩ ሕሚት አለበ። ሐቅሁ ዲብለ ተለ ሰኖታት ዲብ ወድቅ ወትቀንጽ፡ መዳልየተ ተሐይሰ ተሐምቅ ዲብ ልብሎ ወልሰአሎ፡ ዲብለ ልትነፊዖ እቡ ለዐለው ከሊማት ተቅዩር ዲብ ወዱ ወምን እለ እለ ተሐይሰ ዲብ ልብሎ ወባድሎ መተንሰየቱም ክምሰል ልፍሁሞም ወዱ ወልጸገሞ ዐለው። እትሊ ለአግቡይ ለአሰክለ ወዕለ ዕግል ትግራይት ዲብ ዔማት አክባር (2007) ጉበእ ትትነፊዕ እቡ ዐለት ሐቲቱ። እግል መሰል ለዲብ የም 18/08/1989 ለትቀረኣ አክባር እት አግቡይ ተርጀሞቱ ልግበእ ወከሊማቱ ምን አሰክ ሰነት 2007 ትትነፊዕ እቡ ለዐለት አግቡይ ሴመ ፈርግ አለበ።

እላመ እት እንተ ዲብለ ሓርያይ ሰኒን ዲብ ከሊማት ዐረቢ ለትዘለለት ትመሰል፡ እሊ ህዩ ለሐሬ ዲብ ወክድ ዐቦተ ትትነፊዕ እቡ ለዐለት ከሊማት እተ ናይ እስትንቡረት አክባር ንፍዕት እቡ ለኢተአምርቱ። ክሉ ምን ተሐት እሻረት ጋብኣት እቱ ለህሌት ከሊማት ገሌ ምን ሐሬ ምሰል ዐቦተ ወእግል አፍህሞት መተንሰየተ እንዴ ትበህለ እግል ትትነፊዕ እቡ ለአምበተት ወእሰክ እለ እንዴ ትወረሰ ትትነፊዕ እቡ ለህሌት ለትለመደ ከሊማት ዐረቢ ቱ።

ምሰል ወቅት ለልትቀደም ዐለ በራምጅ ዲብ ወሰክ ወለዐለ መሓገዝ ዲብ ዘይድ፡ መተንሰየት እብ ክሰሳ ወጠኖም ወሰውራቶም ፈህሞም ዲብ ለዐቤ ጌሰ። መዳልየት መ እብ ቃብል እሊ ዕልቦም ምን ሰነት ዲብ ሰነት ዲብ ልትወሰክ ወቅድራቶም ዲብ ተዐቤ ጌሰት። ዝያደ ላተ ዕልብ መተንሰየት ዲብ ወሰክ ሰበት ጌሰ መሻረከት መተንሰየትም እግለ ፊድዮ ዝያደ አግመለየ። ወእብሊ መተንሰየት ክምሰል አግደ አው ዔማት ቅዝር ናይ ክርን ገቢል ገብአው። ላኪን ለናይ አተንሰየት ጽምእም እግል ትርቄ ዲብ ለአተንሰው ለዐለው ፊድዮ ዐገቦም ወረኣዮም ነደኣ ዐለው። እሊ እብ ትሉሉይ



አሰክ ክርን ገቢል ተንክር ለዐለ አትዐገቦት ወአረእ ህዩ ዲብ አርተታት ወዐገሎት ጭዊት ሰዴ ዐለ። ወእብ ክእነ ህዩ ክርን ገቢል ምን መደት ተውሊደተ አሰክ እለ ባጽሐተ ለህሌት ኢነት ሽንገላተ እብ ብዙሕ መራሕል ሐልፈት። ምናተ ሐቆ ሕርየት አሰክ እሊ ሃድል እት በራምጅ ወብዝሐ መዳልየተ ወመሻረከት መተንሰየተ አሳሲያይ ተቅዩር ወዐቦት አርኤት።

እሊ ልትበህል ዲብ ህለ ምር ምን እግል ክርን ርሒብ ገቢል በርናምጅ ትግራይት ገጽ ቀደም ለዋለ ለምን መተንሰየተ ተንክር ለዐለ ለትፈናተ ረኣይ፡ አትዐገቦት፡ አሸዓር፡ ቅሰስ፡ ተማሲል፡ ሰኣላት፡ መክሐደ ክምሰልሁመ አርተታት ከሊማት ወብዕድ ቱ።

ከ.ገ.ኤ. ዲብ መደት ንዳልመ ምንገብእ ዔማተ መተንሰየተ ዐለው፡

ክርን ገቢል ዲብ መደት ንዳልመ ምንገብእ መተንሰየተቶም ዔማተ ለዐለው። እግል መሰል ምን ዲብ ወክድ ንዳል ልትለኣክ ለዐለ እብ ኣላፍ ለልትዐለብ ጀዋባት መተንሰየት ክምሰል ፈተሽን ዲብ ምር ፋይል 330 ለትፈናተ ጽበዋ ለቡ ጀዋባት መተንሰየት ረከብኩ፡ ምን እሊ 330 ጀዋባት ሰቡዕ ጀዋብ እግል መትፋቀዲ ሐሬኩ፡ ጽበጡ ህዩ ክእነ መሰል፡

1. ጀዋብ ዐገብ ዲብ ከበር የም 24/03/1984

ትብጸሕ ዲብ ክርን ርሒብ ገቢል ኤረትርየ ክፈል ትግራ፡ አሰልፍ ክሉ ሰውርያይት ሰላምዬ ትብጸሐኩም ወዲብ ሰውርያይ ወራታትኩም ዐውቱ ወሰርገል እግል ትርከቦ እተምኤ። ምን እሊ እንዴ አትሌኮ ህዩ ዲብ የም 24/03/1984 እት ናይ ትግራ አክባር እብ ናይ ገብህት ቅብለት ሳሕል ዐውቱታት ሽሬሕ እንዴ ህለ ለሰምዐኩሞ ሐቲ ዘዐት እግል ትሰየሕ ምን እቤቱ። ለዘዐት ክእነ ትብል፡- ጄሽ ሽዕቢ ዲብ ቅብለት ሳሕል እብ ህም-ገም ለሀረሰዩ ህጁም እግለ ዲቡ ሻፍፍ ለዐለ

ጄሽ ዐዶ ደመረ ትብል። እለ ህም-ገም ለትብል ዘዐት ትግራይት ዲብ ይኣነካ ኦቲት። ህምገም በህለት እንዴ ኢተሐሰበ ለትወድያ ተ። እንቱም ሓሰባመ ለዐልኩም ላኪን ለናይ ትግርኛ ሃንደበት ለትብል ከሊመት ተ። ህም-ገም ላኪን ሃንደበት እንዴ ኢትጉበእ “ተዊስ አው መትሸክክ አው ፈርሀት አው ሸቀላት አው ሀማት” ተአሰሚዕ። ሃንደበት እብ ትግራይት ሀደማይት ምን ትብለ ለሐይሰ።

ለካልኣይት ዲብ መከለስ ለትብል ከሊመትመ ዲብ ይኣነካ ተኣቱወ ህሌኩም። ሕጌት መከለስ ትብሎ ዲብ ደንጎበ ምን ትብሎ ለሐይሰ እብል ወደሐንኩም።

ዐውቱ እግል ርሒብ ገቢል! ዐሰማን ኣድም ነቅፈ

2. ሕድ ለመሰል አርበዕ ጀዋባት ረኣይ፡

እሊ ጀዋባት እሊ ሳዓድየ ፈረጅ ዲብ የም 16/12/1989 ምን ቦርሶዳን፡ ሳልሕ መሐመድ ዐሊ ነፈር ቅሰም ዐቂብ ዓፍየት ዲብ የም 24/12/1989 ምን ሕሸክብ፡ ደበሳይ ወልደሚኪኤል ዲብ የም 06/01/1990 ምን ሱዑድዮ፡ ክምሰልሁመ ዕለት ወኣነን ለኢከትብ እድሪስ ጸዕደ፡ አርብዒቶም እብ ክሰሳ ሐቲ ጋራት ምር ረኣይ ከትበው። ህቱ ህዩ ለናይ በርናምጅ ሕላይ ወፋገታት ሰር ሳዐት ሰበት ሐጭረት ዲብ እት ሳዐት ምን ትወቁለ ለሐይሰ ቤለው።

3. ብዕድ ጀዋብ ረኣይ ናይ የም 01/01/1989፡

አክባር ትግርኛ ወዐረቢ ዲብ ደንጎበ ልደገም አክባር ትግራ ላኪን ኢልደገም፡ ሰበት እሊ እትሊ ወቀት እሊ ብዝሓም ሐዳይሰ ሙናድሊን ሰበት ህለው ወህቶም ዐረቢ ወትግርኛ ሰበት ኢለአምሮ ለናይ ትግራ አክባር ክምሰል ናይ ዐረቢ ወትግርኛ ዲብ ደንጎበ ምን ልደገም ለሐይሰ እብል ወደሐንኩም።

ሳሕል

1^ይ ክፈል

ሳሕል ዔማት ሰውረት ተ ዲብ መን እግል ንዐድለ ሳሕል ኤማን ግድላተ ምሰለ ሻንን አድብረ ሽዕብዩት ዲብ ዐቤት ወንኡሽ እተ ሸንገለ ድፈዓትነ ዲብ ሳሕል እብ አባይ ምዶል ደበለ።

ሳሕል ዐሚካሊ ምድርተ ወእግል ሰውረት ጀላለ ነበርናህ እብ ሐያት ቤረቅነ እተ ሰቀለ ለማይት ቤት አማኑተ ገናይዝ እተ ትቀበረ እብ ደሐን ነበርናህ እት ሐጋሰለ አድብረ።

እግል ሳትር ተሐዝወ ጋድፈት ኢኮን እግል በዕለ ክል አድብር ናያቱ ሰዋትር ዲብ ሳጠረ ረሻሽ ምን ዓለለ ወመድፈዕ ምን ትዋገረ ለምዕላይት መፅሚደ ለዕለት ዲብቱ ትፋገረ ሳድሰ ወራር ገርደደ እብ ዋኩቱ አክረረ።

ኢትትሐልበብ ወእምባቱ ቀብልቀብል ታክለ ግናሕ ሉህ አልጌነ ለወጠን ዲብ ትበርበረ ምን አሰራይ ዲብ ጀገት ለኣክዑት ክምሰል ጃለለ ምን ገንሐው ቅወቶም ነፍራይ ቃብልቱ ተሐገለ ወአፎ አምዕል ተሪበት ለሐቆም እቱ ሰበረ ዐገት መ ናየ በ ለግሰት ምርቅት ጭገረ አድብር ሳሕል ወሐውየ ለርኩብ እግሉ ወሰእለ።

ለግዳል አምዕል ግራት አርድ ይኮን አሸፈረ ፈልክት አባል ወናሮ ምፍግር ገሊል ምን ለዐለ ምን ሐድገዩ ዲብ ሕሳብ ድዩሽ ለዲብ ተኣገረ።

ሳሕል ዔማት አማንተ ምና ገይሰ ለጌሰ ወእተ መጽእ ለአቅበለ ዲብ ዐሾርም ለሕርም መሀየእ ምን ምፍጋረ ዲብቱ ትሰለበ ለሰላሕ ኤረትርየ ሐረረ ምህርቱ ዲባቱ ትበተኩት እስትዕማር ለማሌ ተሐልሐለ።

ግን ወሕሸክብ ቀይሓት ወዲታሮ ሚ ገብእ ተሐኩነ እንቱም ዐልኩም ነባሮ ደብር አቦት ወድህን ዐምበርቡብ ወመሓዝ ዲታሮ ኣዜ ሰክባቱ ለአርድ ለጠያር ዐለ ወግሮ ሳሕል ላቱ እብ ኣኣይቡ ኢትሰኣለ ዲመ ዐለ ጸውሮ።

ደብር ደንደን ወዐጋመት አዩ ዳሊ ፈግሮ ግለዕ ወቀብር አርዋም ለተእሪክ ዲመ ዘክሮ ተብሕ ለዓሉ ወተሓቱ ለሰውረት ዐለት ተሐድሮ ለዋዕም ረኤነ ወመራር ለበዲር ዐልነ እንሰትሮ ጀላብ እለ ኤረትርያቱ ለክሉ ዐልነ እንክህሎ ሳሕል ዐድ ሐበናተ ለሕያይ እንዴ አንበረት እግለ ሞተ ትቀብሮ።

ሐቆ መጸ ለእያሙ ለአማን እግል ንትሃጌ ሳሕል ዔዳት ሰውረተ ለረኣሰ ገብኣት ወድጌ ለክሶሕ ዐለ ተጸሬ ለሕሙም ዐለ ተነጌ አምዕል ብጽዐ ወብቆት ደማን እናተ ወሕጌ አምዕል ፈረሕ ወደሐን ዘጋ እናተ ወድጌ ለደብረ እንዴ ንሸፈል እት ረሸመተ ንትገሌ አባይነ እንዴ ነትውዕል ምድር ጸብሕ ወመሴ።

ሸሂድ ናይዝጊ ወልዱ (ወድ ህይገት 1991)


ምን እስማኒል አብብከር ኣድም ገራጅ ነቅፈ አቦሎ

4. ጀዋብ ሰኣል የም 20/11/1987፡

ሰልፍ ክሉ ናይ ቀልብ ወሰፈላል ሰውርያይት ሰላመቼ ትከቡቶ፡ ምኑ እንዴ አትሌኮ ዲብ ናይ ሕላይ ወፋገታት በርናምጅ ሰኣል አው አትኣገቦት ህለ እግልዬ፡ ህተ ህዩ እለ “ ፋገታት “ ለትብል ክልመት

ተ። ፋገታት ለትብል ዘዐት እብ ብዕዳም አንፋር ትግራ ክምሰል ቅሸሽ ወኣትኣዘሞት አጀኒት ሰበት ለአሙረ እብ ከኣፎ ብህላመ ህሌኩም? እግልሚ ህተ ተሐሬት? እብ ፋይሐት ገበይ እግል ትሸረሐዋ እዬ ሐዜ ህሌኮ ወደሐንኩም።

ዐውቱ እግል ርሒብ ገቢል! ምን ዐሰማን እድሪስ መሰከር ብደህ ኣርታ(ዐፈርብ)



ፍረቅ ጉዲም መትፈላል ሳደፈዩ



እሊ አሌላት እሊ እብ ዓመት እብ ሰብ አስሐብብ ሰዕላት ኮሮን ቫይረስ ወራታት ጅግረ ርዶደት ጅሙድ ሰበት ሀለ ከበራመ ብሩድ ሀለ። ምን ርካቡ እሊ ተሌ ተ። ከሚሽ ዮም 19 ማርች እተ ገብኡት ትልህዩ ሻምፕዮን ፍረቅ

ኩረት እገር ሱፐር ድቪዥን ኤ አቅሊም ምግብ፡ ፍረቅ ስሙይ ንቃዋ ከሰረ። ደንደን ሰቡዕ ንቅጠት እንዴ ጸብጠ ምስል 10 ንቅጠት ለዐለት እሉ ፈሪቅ ሸሪከት ሰምበል ተልሀ። እት 11 ደቂቀት ፈሪቅ ሰምበል

ብርሃኔ መሓሪ እበ ሰጀለዩ ጎል 0 - 1 እግል ዕርፍ ፈግረዩ። ሐቆ ዕርፍ እብ ጀሀት ደንደን ብዙሕ ጀርቤታት ምንመ ዐለ እግል ልትሰርገል ምን ኢቀድረ ትልህዩ እብ ዐውቲ ሰምበል 1-0 ተመት። ቀደሙ ለተልሀው አዱሊስ

ወገዘባንደ፡ እት ሓምሳይት ደቂቀት ብላል መሐመድ ጣህር ናይ ገዘ በንደ እበ ሰጀለዩ ጎል ትልህዩ ዲብ መሬሕ 1-0 እግል ዕርፍ ፈግረው። ሐቆ ዕርፍ ሄኖክ ምክኤል እት 73 ደቂቀት ጎል ምን ሰጀለ ወእት 75 ደቂቀት ምን ደግመ እት 90 ደቂቀት ሀይ ሳሙኤል ሃይሉ ሳልስ ምን አተ አዱሊስ 3 -1 እንዴ ተዐወተ ፈግረ። ሳልስ ትልህዩ ናይለ ምዕል ፈሪቅ ሸሪከት ብኸ ሰገን ምስል ፓራዲዞ ዐለ። ሰገን እት 20 ደቂቀት ጎገ መሓሪ እበ ሰጀለዩ እለ ጎል 1-0 ማርሒት ጸብጠት። መተልህዩይ ፈሪቅ ፓራዲዞ ኤስርም መሴ ለምዕል እት ብቀት ለከሬ ትልህዩ ምን ተልሀ እብ ከርት ቀይሕ ምን ሚዳን ትጠረዘ። ትልህዩ ሀይ እብ ዐውቲ ሰገን 1-0 ተመት። ክል ፈሪቅ ሐምስ ትልህዩ

እተ ተልሀ ዲቡ ናይ ዮም ዓመት ሻምፕዮን ቀይሕ ባሕሪ ወሰምበል ሰወ 13 ንቅጠት እኩባት ሀለዩ። ፈሪቅ ቀይሕ በሕሪ ክልኤ ዝያደት ጎል ሰበት ብእቲ ላኪን አወላይ ሀለ። አዱሊስ - 9 ንቅጠት ሳላሳይ፡ ሕድ ለሽብህ ንቃዋ ለአክበ ሰገን ራብዓይ፡ ደንደን እብ 7- ንቅጠት ሓምሴ፡ አልተሕሪር 6- ንቅጠት ሳድሴ፡ ዕዳገ ሐሙስ እብ 6- ንቅጠት ሳቤ፡ ፓራዲዞ እብ 5 - ንቅጠት ሳምን፡ አስመረ ቢረ እብ 2- ንቅጠት ታሴዕ ወገዘባንደ እምበል ንቅጠት ዓስር ጋብእ ሀለ። እሊ ክእን እት እንቲ እብ መናሰበት ሰማን ማርስ እተ ገብእ ለህለ ጅግረ ኩረት እገር ፍረቅ አዋልድ አንሳት ገጀረት እግል ሰምበል 2 እብ 0 እንሹራንስ እግል በራኽ 13 እብ 0 ደንደን እግል ጎዳይፍ 12 እብ 0 እብ ለገብእ ነቲጀት ቀልበያህን።

አደቀቦት መቅደረት ርዶደት አዋልድ አንሳት ለልዓቤ ታእሂል ተመ

ወጠንያይ ፈደረሽን ጅግረ ዐጀላት ኤረትርዩ እግል አደቀቦት መሻረከት አዋልድ አንሳት እት ርዶደት ለሀይቡ ለአስመነ ታእሂል (Women Empowering course) እት ዮም 22 ማርስ 2020 አትመመ። እት መትመሞ ናይለ ምን ክሉ አቃሊም ለትወከለዩ 15 አንሳይት ለሸረከዩ እቲ ታእሂል፡ ርኢስ ወጠንያይ ፈደረሽን ጅግረ ዐጀላት ኤረትርዩ አሰይድ ተወልዳ

ዮውሃንስ ዲብ ለአስመዐዩ ክሊመት፡ ለናይ ታእሂል በርናምጅ እት መጃል ጅግረ ዐጀላት ለለአወቅዩ አንሳት መቅደረተን እግል ትወቀል ክም ሰዴ እንዴ ሸርሐ፡ ለታእሂል ናስኢት ለህለዩ ለረክበያህ ምህነት እት ሸቁል ዲብ ተርጀሞት ወዲብ ብዕዳት እብ ሐለፎት፡ ለትሳዌት መሻረከት አንሳት ዲብ አከዶት ዶር ማርሒት እግል ለአግድዩ ትፋኑ። ለምን ዮም 20-22 ማርስ 2020



ምክር ምን ዳርሳም ኤረትርዩን፡ እብ ክሱስ 'ቫይረስ ኮሮን'

እት ካርጅ ለነብሮ ዳርሳም ኤረትርዩን እት ለልትረከቦ እተን ድወል ለነብሮ መዋዋኒን ምን መትለባድ እብ ቫይረስ ኮሮን እግል ልድሐኖ እብ ሸክል ሰሚናራት፡ ቴሌ-ኮንፈረንስ፡ ሺድዮ ኮንፈረንስ ወብዕድ አግቡይ እት ወቀሎት ፈዛዐት ወፊህም ለረከዘ መባደራት ነሰኦ ሀለው። እት አሚሪካ ለነብሮ ዶክተራት ሰናይት አብርሃም፡ ዶክተር ተኪኤ ተሰፋይ ወዶክተራት ሃነ ሃብቱ እት ዮም 15 ማርስ እብ ሕበር እቲ ለወደወ ቴሌ-ኮንፈረንስ "ኮቪድ19" ለልብል ሰም ሀይብ ለህለ ቫይረስ ኮሮን ምን አሰል ለ እብ 'ነርስ ወ 'ሳርስ' ለልትአመር ኖዕ ቫይረስ ክምሰልቲ፡ እት አግቡይ መትዐዳዳይ ወመጸበዋ መረ ሸፋግ ሰበት ቡ ፍንቱይ ክም ወድዩ ሸርሐው። ለኤረትርዩን ዶክተራ፡ ኮሮን ቫይረስ እት ጀው ምን ለዐል ሰለስ ሰዶታት እግል ልጽነሕ ክምሰል ቀድር፡ እት ፕላስቲክ፡ ሓጺን ወዕጩይ ላኪን ምን 2 እሰክ 3 አምዕል እግል ልጽነሕ ሰበት ቀድር፡ እሊ ለእሉ እምቤ ሐቆ ተምተሞት፡ አፋኑ ዕንታትነ አው አንፍን ዶል እንጸብዋ እግል ልዕዴ እትነ ሰበት ቀድር፡ እደይነ ወገጽን እብ ነዳፊት እግል ንጽብዋ አትፋቀደው። "ቫይረስ ኮሮን፡ እት ገሮብ ምን አተዩ አሻይር አሰክ ለአርኤ ለክለ መደት፡ ምን 2 እሰክ 14 አምዓላት በጼሕ። እት ቀበት 14 ምዕል አሻይር ናይለ ሕማም ለአርኤ እት ለገኦ ሐድ ዕምር ለልትረከብ አዳም ሀይ እበ ቫይረስ ጽቡዋ ህለ ባህለት ቲ" ለቤለው ሰብ መቅደረት፡ ሐዘ፡ ግልዕሰት ለኢሊፊግሮ ግንፋኦ ለመሰል ሰዕለት፡ ክምሰልሁመ መዳያግ ትንፋስ ምን አግደ አሻይር ክምሰልቶም አፍሀመው። እተ ቫይረስ ለትረኦ እተን ድወል ሀይ፡ አንቀሶት መትአኩብ፡ ሰላም እብ እዴ አብጠፎት፡ ነሳፊትክ ዕቅበት እበ ለትትቀደር ሀይ ናይ ረይም ወቅሩብ ለይለአሸፍግ ሰፈርያት አንቀሶት ለሸምል ከዋዋት ልትነሰኦ ክም ህለ ሐበረው። "በርበሬ ወብዕድ መሪር ቀመማት ወነበሪት ምን ሕማም ቫይረስ ኮሮን ለድሕኖ" ለልብል ሀገጊት አሳስ ዕልም ክም አለቡ ለሐበረው ኤረትርዩን ደካትራ፡ ለቫይረስ እሰክ እለ ደወ ሰበት ኢትረከበ እግሉ ሐለት መቃወመት ገሮብ፡ በህለት ገሮብ ደቅብ ተሐሙል ምን ሕማም እግል ለህሌ እሉ ቅዛእ ሰኒ መትመዋን ወማይ ልግበኦ ወብዕድ ሐዲስ ዐሳይር ፍሬታት መትመዋን ምህም ክምሰልቲ አክደው።

እብ መቅደረት ኖስ ናይ ወጠንያይ ፈደረሽን ለተግበረ በርናምጅ ተእሂል፡ መአንበት ተእሂል ብሐሱ፡ አግቡይ እዳረት፡ አብነት ወተሐድያት አዋልድ አንሳት እት መጃል ርዶደት ፈረንት ወለነፊዕ አብሳር አደቀቦት ወቀዮሮት፡ ልቃኢት ወአግቡይ አክቦት ሐብሬ ወብዕድ እቲ እንዴ ረከዘ ተሀየብ።

ሕማም ቫይረስ ኮሮን ለክሰስ መምሬሕ ውዛረት ዓፍየት - ዕልብ 3

ኔብራይ ኖርወይ ላቲ እብ ሕማም ኮሮን ቫይረስ ለትጸበጠ ኤረትርዶይ፡ እት 21 ማርስ 2020 ዲብ ኤረትርዩ ክም አተ እብ ዒማት አክባር ዐድነ ሐብሬ ህይብት ዐለት። ለሕሙም ለተትሐዜ መራዐየት ወመታበዐት ትገብእ እሉ ሀሌት። ምስሉ ዲብ ሐቲ ጥያረት ለመጽአው አንፋርመ እት መክልከሎት ዓፍየት ክም ለአቲ ጋብኦም ሀለው። ውዛረት ዓፍየት፡ ክሎም መዋዋኒን ወዲብ ኤረትርዩ ለነብሮ ውላድ ካርጅ ለትወቀለ መትደጋግ እግል ሊደው ደሐኖም ወደሐን ወጠን ለሀደፋ መምርሒታት ሕኩመት እብ ሸደት እግል ለአተግብሮ ዲብ ተአትፋቅድ፡ እት ረከሰለ ቀደም እለ ለተሀየበ መምሬሕ፡ እሊ ተሌ መምሬሕ ወሐብሬ ወሰክ። 1. ክሉ ሸዕብ ላዝም ወሻፍግ ኢገኦ ምንገብኦ፡ እተ ዲብ ነብር መዲነት ወቀርየት ለወድዩ ሐረከት፡ ክምሰልሁመ እት ቀበት ዐድ ለወድዩ ሐረከት እግል ልብጠር ምኑ ወጅብ። ክል ነፈር ደሩሪ ኢገብኦ ምንኢገብኦ፡ ኢመትነፈዕ አተቡሱ፡ ሚኒባስ ወተክሰ እግል ለአብዋር ወጅብ። 2. ዝያድ 10 ነፈር ለሻርት ዲቡ ክሉ ጅንስ እጅትማዓት፡ ናይ ርዶደት ወዳዳት ወራታት ሸጡብ ሀለ። ሲነማት ወአብያት ሰሰዒትመ አሰክ መምሬሕ ብዕድ ልትሀየብ ድቡእ እግል ልጽነሕ ቲ። ዲብ ብዕድ አብያት ተጃረት ሀይ አዳም ምን ሕድ እግል ልትፈናቲ ወጅብ። 3. እት መናሰባት እጅትማዕያይ (ህዳይ፡ ሐዘን፡ ቀብር፡ ሰመያት፡ ጥምቀት፡ ነግድ ወለመሰሉ) ዝያድ 10 ነፈር ለልትረከቦ ዲቡ ተጀሚዕ ምኑዕቲ። 4. መእመኒን እብ ማርሒት ደያናትመ ልትሐበር ክምለ ሀለ፡ ዲብ ቤቶም እግል ልትሰለው ወልሰጀዶ ወጅብ። 5. ዲብ ካርጅ ለነብሮ ኤረትርዩን መዋዋኒን እግል ደሐኖም፡ ደሐን ዓይላቶም ወደሐን ጃልያት ኤረትርዩ፡ ክሉ ዋጅብ መትደጋግ እግል ሊደው ወአሰክ ወጠን ምን ምጽኢት እግል ልትሐጨሮ ወጅብ። 6. ጀለ ዓፍየት ወደሐን ሸዕብ ወወጠን ልትነሰኦ ለህለ መትደጋግ እንዴ አመሰመሰው ዐውል ለወሰኑ ወዕዳገ ለልሐምርን አንፋር ወመአሰሳት ቃኑናይት ምስዳር ትርድት እግል ትነሰኦ እቶም ቲ። 7. ውዛረት ዓፍየት ተጠውራት /ቴለል ሕማም ኮሮን ቫይረስ ምን ቅሩብ ዲብ ታቤዕ፡ ለልትሐዜ ሐብሬ ወመምርሒታት እግል ተትሓላልፍ ክምቲ ተአትአምር።

ዓፍየት ወደሐን ዝያድ ክሉቲ!
ዐውቲ እግል ገቢል
ውዛረት ዓፍየት 23 ማርስ 2020

ክርፈ አንበጣጣ እት ሰዋሕል ኤረትርፍ

(4^ይ ወናይ ደንበሰ ክፋል)

ሐቲ ምን ዳሕያት ምዴርየት ሽዑብ ላተ ወቂር፡ ምን ጠቢቦተ ለበዝሐ ምድረ ሸምሸም፡ መሓዛት ብዙሕ ለልትጀመፅ ዲበ ሰበት ተ ህዩ፡ እብ መትሸርሻር ትርበት ምን ትደመዐ አካናት ተ። ለልትሐረስ ምድረ፡ ትክደመ ምን ጉበኤ፡ እግለ ነቡረ ሰካነ ኢኮን እግል ብዕዳም ለከፊ ቱ። ምናተ ዝላም ትደቀበት ምን ጉበኤ፡ ለወሓይዝ ግረህ ብዙሕ ገሌ ምናም ሀሊ። እት ረኣሰ ፈርሀት ወሓይዝ ህዩ፡ ወራር ናይለ እክለት፡ ቀዋፊት ወሰዐረት ለኢልምሕክ አንበጣ መጽእ ምን ጉበኤ፡ ለሽዑብ ወንዋዩ እት ብቀት ሰፍረ ሰበት ልትካፊ፡ ለካድም ምን ደዓም እብ ለሐሰ መትነዝም ዋድያሙ ጸንሐውኹ።

እተ ባካት እብ ሐርስ ለልትናበር ሽዑብ ወቂር ወወድ ኢሎ እት ጉበኤ፡ ምን ቆምያት ትግሬ



ሓሰን ዓምር

ወረሻይዳ ቶም። እብ ሐርስ ወርዕዮ ህዩ ልትናበር። ከምንለ እት ፊራር አንበጣ እብ ነሐርም ወሸዐም ከድሞ ለጸንሐውኹ አንፋር ልጅነት ግረህ ወቂር አሰይድ ዕጁል መሕሙድ እብ ከኦፎ አንበጣ ካፍሖ ክም ህለው እት ወዴሕ እግልኩ። “ አንበጣ ክም መጽኢኩ እት አርበዕ ሄክታር ለጉበኤ ግረህ ኦተ ምኒኩ። ሰማን ነፈር ታውራት አንበጣ እት ካሰኣምም ዐልኩ። እበ ሐብሬ ለህቶም ለህይቡናተ፡ ክል ምዕል 22 ነፈር እት ነኣትፈርር፡ ዋርምባት እት መሸንገሎም እንዴ ረፍዐው፡ ላሊ ወአምዕል ዲብ እንረሸፍ አብዴናሁ። እምበልሁመ እተ ዳሕየት ፍንጡር እት እንቱ ሰበት መጽኢ፡ እተ ምድር ለጣፊሕ እብ ዐረባት እት እንገይሰ እንረሸፍ። ለሸዓርን ‘ወድ አርዌ ሕደግ፡ ወአንበጣይ ቅተል ቱ’። ሰበት እሊ ኣዜ እክልን እት ሳልሰ ወካልእ እተይ ባጽሓም ህሌኩ።



ከሪፍ ህዩ በዲር ኣቲናሁ።” እት ልብል፡ ሽዑብ ዕን ወእግር ናይለ አጅህዘት ሐርስ ወእዳረት ክም ዐለ ኢሰትረ።

መስኡል ዳሕየት ወቂር አሰይድ ጃብር ሰሌማን እተ ናይ አንበጣ ዛህረት ክእነ ልብል፡ “አንበጣ እትሊ ባካትን ንቡር ቱ፡ ዶል በዜሕ ወዶል ልውሕድ ድኢኮን፡ ሀሊ። መሰለን ደዓም፡ እለ ወቂር እክለ በልዐዩ ከእተይ ኢረከብኩ። ንቅጡት ናይለ ሐርስ ረዩምን እት እምቢረሚ ሰበት ዐለት። ዮም ዓመት ምን ናይ ደዓም ሰበት ደረሰኩ፡ ምን ሰልፋ አካናትለ ወሊዱ እንዴ ቱርን ሰበት ሐበርናሆም፡ ውዛረት ሐርስ ለንቅጡት ዲብን እት ወቂር እንዴ ገዐዘት፡ ዮም ዓመት ለኣከ ወራር አንበጣ እት እክልን ወሰዐር-ንዋይን እፍሩህን ለዐሊ፡ እብ ሸቅል ሐበር ደከን ወዴናሁ። እብ ሐሸምት ብዙሕ ለዐለ በደ፡ ኣዜ ሐድሐድ ምኑ ታርፍ ሀለ ወእብሊ መካይን ወኢጋርን ለኣክሩ እግል ነኣትዐሬ፡ አሰክ እለ ዮም መሀሮትን ሳዳም ጸንሓምኩም ህሌን” እት ልብል፡



ዕጁል ማሕሙድ

መሻረከትለ ሽዑብ ህዩ ምን ኩሉ ለትትሐመድ ክም ዐለት ሸርሐ እኩ።

ኣቡነ እድሪስ መሐመድ እብራሂም ምን ሰካን ወቂር፡ መሻረከትለ ሽዑብ እት ሓረቦት አንበጣ እት ወሰፍ፡ “ሕነ ደዓም እተይን እት እንርእዩ አንበጣ ሰበት ሰነ እቡ፡ ዮም ዓመት ኩሎም

ሐረሰቶት፡ ምስል እዳራቶም ወመክተብ ሐርሶም እት ልትሳደው፡ ወቀዮም ብዕድ ምኑ እንዴ አዝመው፡ እግል አብደዮቱ ቀንጸው። እበ ጉበኤ ለዐለ ሕፍዝ ህዩ፡ እተ መሳክቡ እብ መካይን ወአዳም ዕዉታም እቱ ህሌኩ። ግረ እላመ ውሕደት ወዐመል ምስል ጌሰ ምን ጉበኤ፡ አዳም እተ



ጃብር ሰሌማን

ኢልትዐወት አለቡ። መስኡል ዳሕየት ወድኢሎ ሐሰን ዓምር ምን ቆምየት ረሻይደ እት ጉበኤ፡ ለአንበጣ እት ግርሆም ክም ሸኣገ እብ መካይን ወአዳም ክም ተዐወተው ዲቡ፡ ምናተ ኣዜ ለእክል ክም በሽለ ሰራይር ጸሊም ቡብ አው ሺቀ ለልትብህል ዓሽል እቱ ክም ሀለ ወደሐ እግልኩ።

እት ደንበሰ እሎም ዲብ ወቂር ለኩበር ሰካን፡ ሸቅል ሐበር ፍሬሁ ገማል ወዐማር ክም ቱ ዮም ዓመት እብ ዐመል ክም ረኣው እት ወድሖ፡ እተዮም ምነ ተሀጦጥል እቱ ለዐለት ብቀት አንበጣ እንዴ አተክረው፡ እት ሰእዮብ ሰኔት ክም ህለው ሸርሐው እግልኩ። ዛህረት አንበጣ እት ሰዋሕል ዐድነ ክም ትረኡት ህዩ፡ ሕኩመት እብ ሰብ መቅደረት ውዛረት ሐርስ መጦርም እንዴ በጥረት እት አብዳይ አንበጣ እተ ወዴቱ ጸገም ከዲብ አበርካት እተዮም ለሰዴቶም ቱ ጅህድ ሐመደው።

እት ደንበሰ፡ እት ጋድም-ሐሊብ ምስለ ሐረሰቶት እት ወራት ክርፈ አንበጣ ፍሩር ለጸንሐኩ ነፈር ፍርዕ ውዛረት ሐርስ ምዴርየት አፍዐበት ላቱ በዐል መቅደረት ራዐዮት ብቅል (plant Protection) ሻብ ዐብደልርሕማን ያቆም ዐሊ፡ እሊ ኩሉ እት አብር (ጋድሞታት) ቅብለት በሐር ቀየሕ ጉበኤ ለህለ ወቀይ ካፍሖት አንበጣ እብሊ አብያት ሸዕር ሻርሐ ሀሊ፡

ወራታት ጋብሆት አንበጣ እት ቅብለት በሐር ቀየሕ



ዐብደሩሕማን ያቆብ

ምን ሸሀር 10 ገዱ ሐር እንራቅቡ ለአንበጣ አሰክ ኣክር ሸሀር ሰለሰ ሰነትክ እበ ሰነት ሳርሸይ ወዱ እት ባዶብ አንፋርሊ ሕርሻ ባልዲን ለህሌ ወኢሊህሌ ደዋይሕክ ትፈትሻ።

ሄራር ሰለሰ ወሬሕ ወዐሰር-ክልኤ ሳምን ምነ እት ዋቄዕ ለዐለ ጅዙእ ኒበል ሚ ስምን ዲብ ነዐራሬ ወእንሰፊ እት ነኣትሐጭር ወእንጨምም፡ ናይ ዮም እንዴ አሰፊኩ፡ እት ወራት ፈጅር ነህምም በታተን ሸፍር ኢነዐይር አሰክለ ወራታት ተምም።

እትለን ንቃዋ ነኣትንክብ ወእበን ልጥዕም ለሸቅል እት ነሐፍዝ ጠላለት ወሰዐር ፋግር ምን ምድር ኣክር ዕለት ናይ ዝላም ወሀለዮት ፈር ምን ብዝር ወርሕብ አርድ እብ ሄክታር ለልትሐረስ እግል እክል ሸማሽም ወድቡብ-መትፋራይ እንታይት ክል ፈጅር ሰካውት፡ ሐረሰቶት ወኩሉ አዳም እተ ባካት ለነብር ዓያን ሐብሬ ንትሰኣል፡ እግል በደ አንበጣ እብ ክል እንክር እግል ሓዚ ዐታብ ለለምም ወዐባዩ ለነፍር እሉ ነሐድግ አለቡ ጋድሞታት፡ መሓዛት ወአድብር ወእሉካሰት ንትነፈዕ ለህሌት ሓለት እግል ነኣትብር።

ፊራርን መጋዌሕ ወመቃብልን እት ላሊ ተጅሚዕን እንወዴ ከነህድግ እቡ ለሐዋሊ ለወዐልናሁ እንሸፊሕ ወናይ ፈጅር መውዐሊ ቴክሰቲን እንክትብ አሰክ ተሰፊት ጠዋሊ።

ጠላለት ህሌት ምን ጉበኤ ወሐፋነት ጀፈረ ሐቆ ወልድ ለአንበጣ ወኣካናቱ ተአመረ ዐታብ ፈግር ምን ምድር እሰቡዴን እንዴ ቀረረ ‘ሶሊታሪ’ እንብሉ ሐቆ ምን ሕድ ትፈንጠረ ወምስል ትጀመዐ ምን ጉበኤ ‘ጋሪጋሪ’ ትበህለ በሮት ጸላም እት ቢጨ ለሕብር እንዴ ትመሰለ ክእነ መሰል ጠባይዑ እግል ለአምር ለትሰኣለ ነኣሌልዩ እብ ክትምየት አንበጣሊ ሰሓረ።

ዶል ለዐታብ እንረክብ እት ልሽሕግ ወእት ለምም ንትካረፋ እብ ጅህድ እንዴለ ምድር ኢለዐምም እብ መካይን ወነሐር-አዳም እተ ኣካት ልትሰመም እግል ኢልበርክት ከኢልትባዘሕ እብ ሐሸም ምድር እግል ኢልዕመም ወኢልግበእ ‘ሰዋርም’ ላሊ ወአምዕል እንሸቂ አሰክ እሉ ነኣትምም።

አውለውያት እት ነህይብ ከለሰናሁ ለወራር እብ ‘ኢማቹር’ ነኣትብዴ እንዴ ኢበጹሕ እት ንፋር ራቤዕ ደረጅ ውሓምስ እንሰትት ‘ግል ልትዐወት ለመጃል እበ ፊመት ነኣትነንዴ ሐቆ ትነሰእ ሰፈር ነሃር።

እብ መጅሙዐት እንሸቂ ናዩ ናይክ ለአለቡ ምን ቅሮረ እብ ለዋው አሰክ ድዋራት ገልዐሊ።

እት ክል ሐል ንትፈረር እግል ካፍሖት አንበጣ እብ ደሚር እንሸቂ ሐቆለ ኡታን ትሰተተ ገሌ ነዝም ሐረሰቶት ወገሌ ባዶም ሰንጠገ ገሌ ረሸርሸ እብ እደይ ወገሌ ዐረባት አንጠገ እሊ መሰል ወቀይኩ አሰክ ነኣቱ ለደገ።